

序

古之爲詩若文者大都得之宦游羈旅山川風物之助又必其人性情深厚才氣豪邁不凝滯於外物然後有以直抒其中之所得而岸然成一家之言少陵寓蜀最爲流離困頓其詩作於夔州者爲最工子厚在臺省時文章猶沿六朝綺靡之習及貶柳州後始刻厲與西京相上下吁二子者可謂文章之正宗矣余於東萊獲交陳子子帥喜其胷次軒豁行誼純篤兼負不羈之氣已而讀陳子詩集醇雅中天然秀拔有凌虛御風之槩文則原本經術而浸潤於子史無

序

一

繁言無飾貌其論次近代諸家得失多有未見所未及者子帥家閩江以儒官爲佐領二十年來奔走從事足迹半天下而秦之扶風齊之東萊屬君宦轍所歷故著述爲尤富余按傳記扶風在漢時與京兆馮翊稱三輔若班孟堅之史才馬文淵之將略赫赫在人耳目而東萊瀕海上秦皇漢武所巡幸以望三山處也

國家肇造區夏東取齊西并秦羣策羣力兼收並用當是時起徒步致尊顯者甚衆天下已定郡國士通籍者一切循資序遷雖宏才博學如子帥上之不能

珥筆禁林策勳天府如班馬輩所爲復營升斗以養其親退不得隨安期羨門之徒茹芝飲泉徜徉乎方外徒以落拓抱關之餘大肆其力於章句篇什間以自遣放亦何異少陵之於夔州子厚之於柳州也然子帥有志乎古之道者志乎古之道則其詩若文猶不足盡其人況區區遇合顯晦云爾哉余亦力摹古人而未之逮者樂就正於子帥故序之而不辭  
康熙壬子花朝吳興年會弟嚴允肇頓首拜書

疊齋詩刪目錄

四言古一十二首

三言一首

五言古一百四十九首

附一首

七言古三十四首

五言律二百七十九首

附一首

七言律一百九十五首

先人一首  
附一首

五言排律一十三首

七言排律五首

五言絕一百四十六首

六言一首

七言絕一百七十九首

雜言二首  
附一首

NATIONAL CENTRAL LIBRARY, TAIWAN, R.O.C.

詩餘三首

共一千四十一首 存附五首

續刻五言律一首

臺齋詩刪卷一

晉安陳允錫子帥著

四言古

夢嫡母

謂母來思母則安之謂我往思我固在斯來亦不言  
去亦不辭舍我倏逝後夢何時嗟我行役支骨分離  
瞻望弗及寤寐相追寒泉霜咽空谷風悲影匪形依  
響乃聲爲

寄子善

我始一子實繼三宗

余三世居長

年及就傅早敬爾躬自

媿式穀薄宦西東無有遠邇期望則同

示子力

汝今繼禰是爲小宗

力出繼子儼弟

我念爾祖一人之躬厥

惟手足何分西東克家世美存歿願同

懷桂青山

一名貴清山在岷州衛

洞雪陰陰巖石磊磊哀壑有聲三峰不改山中奇光  
雲霞流彩交陰松筠服媚蘭茝真寄同歸素心斯在  
同游蔣聞大跨鶴夢游閒雲相待

見白髮

昨見白髮中心悒悒今見白髮中心怡悅平昔多憂

遭世末流甚矣吾衰早歲白頭兄弟告殞年未四十  
欲見白髮猶不能及雨不上天白豈再玄今我何爲  
且順自然

哀殤

壬子四月七日生一男不育念亦吾子也哀之以  
詩

天欲死之曷爲生只天旣生之胡遽死矣迎生之辰  
送死之晷何以處憂何以處喜汝不識父我猶識爾  
爾準徒隆爾貌空美有耳不聞有目不視衣以敗絮  
裝以敝甌荒園攜鋤坎澗兩咫五十始衰生復有幾

墮地無聲汝事則已

登岱觀海

天下既小衆水亦難物各有極高深齊觀稽天一氣  
拔地千盤日月風雷奔走其間清秋來登灑氣先寒  
流峙終古不溢不騫諸峰趨向有如波瀾睽言顧之  
方寸浩然江漢宗海恆霍隨山似我碌碌良可嗟歎

讀書

鑷鬢染髮妻妾是娛濃酒肥肉交遊是逐求田問宅  
兒孫是役無益於已亦誠可止老至不知惟讀書宜

四月

傷隕霜殺麥也六章章十句

四月繁霜二麥卒傷不實何秀未秋先黃去年社日  
播種入土三冬望雪一春祈雨及夏而萎民將何怙  
恂恂孺子莊莊乎士莽莽衰白野草同死薰風鼓浪  
綠漲平疇鳴鳩雉雉麥氣迎秋一夜青女穫之無留  
木維秋落草亦冬枯方苞隕籜嘉穀何辜將欲去之  
尚冀餘粒將欲留之秋種不及瞻顧徘徊旋鋤旋泣  
何以事神何以育人師旅饑饉造物不仁饑猶可過  
饑猶可忍羽檄交馳催科正緊杼軸二東民力已盡  
時之不審勢之不度禍起西南蔓延東北重以災荒

民怨傷國哀哉孤子悼此逐臣無家可歸羈旅食貧  
君民一體承宣百爾告賑告蠲痾瘵猶已平糴勸分  
豈無君子輔翊畿甸近在東方息盜寧人事曷可忘  
古詩

上壽滿百八十次之弱壯老髦如彼四時我年四十  
春夏已過天地秋冬生意無多況在人身能與幾何  
怡我情性立我脩名芳草鸚鵡無使先鳴

題半千集

行年五十存詩五百刪之又刪以損爲益性與之近  
學因有獲稽古始基居今致飾身老不知位卑何惜

敢曰能言猶媿立德小子趨庭聊以爲則

歸田偶作

去年所事錢穀刑名今日相親荔支素馨自勞吏觀  
花鳥匪清就逸老論圭組豈榮非其相笑緩急殊情  
泛泛相值心無將迎誰識其解庶幾達生

三言附

詩

一卷書有精義一簞食有至味一覺睡有真意於三  
者尋樂事



五言古

旅夜泛舟

旅館接江渚盡日煙水光晚來天氣好新月照林塘  
料理扁舟入未知浦漵長無心任所適帆轉何茫茫  
忽然愁思集對此媿行藏有懷徒太息月落水如霜  
返棹遵歸路暝色夜蒼蒼

古詩

古樹鳴悲風風息鳴亦止哀哀寡婦聲秋原哭未已  
徒傷孤客心難徹重泉耳棄置勿復陳誰是不死人

又

悠悠日行邁千里隔關河渡水愁浩蕩登山倦跛陀  
今夜秋館靜寧寢好夢多逢我山陽友見我霸陵妻  
生死與遠近一時聚自齊但識夢中樂安知醒後悲

又

當我未出門欲行常百慮再拜託友朋一心向親故  
秋蓬隨風轉行止聽道路豺虎滿南州荆棘起跬步  
遊子望家鄉雲山莽回互但得你安貞敢辭年歲暮

粵歸

寒色鎖孤城幾點暮煙翠遊子望故廬風雨叩門至  
自昔行路難況復經亂離今夕得旋歸誰云非望外

又

老母見我來喜極更垂淚少婦見我來欲問還生媿  
一如意外獲寧知尋常事險艱不敢道恐傷老親意  
入門悲喜兼百凡未遑慮今夜到家身生還自歡豫  
嚴父尚他鄉夢魂又何處

落第後將赴調次寄別崔越

所望竟何成百憂浩無極內顧平生心茫茫不自識  
為貧宜居卑低頭就枳棘海國氣多陰秋郊雲正黑  
坎凜當此時何以抒胃臆濁醪妙理存醉後不記憶  
惟我臨風人耿耿非朝夕為問何獨然知心余夙昔

上黯澹灘

由來此灘險聞名已戒心雷聲擁急峽雲氣積重陰  
而我逆流上劔拔凌千尋同舟自相救涉險無危傾  
一心能共濟贊彼造化靈何爲生試拙長與風浪爭  
無心媿未能有孚存我誠

與威寶試茗有懷秋濤

去年茶熟時依依共宵晨今年茶熟時談心非昔人  
茶猶得再試斯人不復春新知良可樂舊恨不堪論  
新水舊泉脈新茗舊茶根遲遲攜手意中有故人存

悲秋

秋氣入朝心窮士感自淡要津策高足幽人守舊林  
如何兩失據壯歲坐銷沉

又

野宿晨光動荒雞鳴欲闌征人懷遠路攬衣不遑安  
悲秋雖一事幽感亦多端嗟余遭不造生計實艱難  
負重不擇地奔林比窮猿五斗慙束帶十年誤儒冠  
涼風變時節旅衣驚薄紈蟋蟀依南戶晨風鳴北山  
中夜起舞心千載遙相關去日東逝水何時復來還

出固關望平陽作

匹馬去長安風雪度固關行行指汾絳山高草木寒

卷一  
睽彼陶唐人一去不復還遺風餘民俗景物留山川  
室廬自相係生計樂園田嗟我宦遊子奔車歷歲年  
離鄉已云遠出都復茫然爲親就升斗相去各一天  
聞道聖人世物情得自全

覽鏡

古鏡照病容面瘦宜鏡古如彼泉與石濯濯兩清楚  
坐見鏡中翁前來吾問汝汝生旣爲人美稱號曰父  
胡然貞不字待年一似女胡然失形勢英雄無用武  
胡然官乘田作吏同牧圉胡然出奉檄事親乏升釜  
俯仰天地間安居無處所鏡中荅鏡外聽我次第舉

吁莫說爾才聰明遜愚魯吁莫說爾學經術後章句  
人今更何尤時方不吾與所以老不逢汝貌似轅固  
所以命不達汝貌似管輅所以吟詩瘦汝貌似杜甫  
所以作文窮汝貌似韓愈人生有定分宋朝與子羽  
癡肥易清臞想君未必許君面我所知君心君自取

交河渡

涇水合渭處

涇渭流旣合清濁誰能分我猶堪行已爾莫怨新昏  
禾黍且溪漑涇水一石其泥數斗且糞且漑長我禾黍鳥鼠可同羣導渭自鳥鼠同穴  
渡頭酤一醉物情任紛紛

望華山作

華嶽位西顛作鎮表秦中挺然何特立足爲五嶽雄  
葱鬱霸王氣不獨視三公終南與太白羅列如附庸  
聖德達上下西顧宅岐豐未造憑形勝虎視壓山東  
遙望只一色焉能剖鴻濛

感省試作

時在扶風署中

養士雖百年較士只一日朝家有期程智愚爭此夕  
黃口每拚飛修鱗遭點額鹿鳴奏雅音承筐次笙瑟  
先王重賓興所貴不失實漢廷策賢良弘諛掩舒直  
唐家取詩賦李杜何落魄好馬不入隊李文饒語牽牛不  
服軛今我空歎嗟撫事感平昔

題班固漢書後

三人成一史猶有婦人焉司馬斯爲盛才難不其然  
包羅貫一代經緯表千年卓識王命論論壯麗帝京  
篇賦女誠師貞順誠怨歌感纏絲詩良史有餘長班  
氏信多賢

夢劉璽

在日心相知死後魂相依卽如今夜夢平昔尚庶幾  
告歸常苦遽君今往何處寒風淅淅鳴聲入窗前樹  
古來誰免此死生如旦暮何必更吞聲吾今已忘情

古意

柳絮無實煖榆錢徒欺貧并催春色老愁殺渡江人  
鳥啼春情賸草發春心盡春夢背人歸去來無定準

淇上古意

陽春二三月衛女遊桑間佩玉兼巧笑容止都且閒  
漕水漲新綠泉源漾微瀾東風吹懷袖春思浩方繁  
垂柳蔭長亭征驂出淇園明眸迴秋水惠心逗芳蘭  
何物相貽贈芍藥比令顏相將非無意嚴程不我寬  
天涯芳草色王孫去住難

過郭璞讀書處

用讀書  
二韻

家山百尺樓先人有舊築近延塏峰秀遠映泉山綠

松風吹我衿蘿月照我讀元亮不甚解孔明觀大略  
自許頗卓犖粲然炯心目衆美任紛披吾意本幽獨  
一行歎作吏數載忘三餘風塵牛馬走形役神不舒  
筆墨荒蕪几朋友隔閒居念及如負疴慙見舊時書  
每當秋風起常夢竹窗虛異苔同臭味千載接襟裾  
今日停車地惆悵其何如

命懷兒

汝生時已後不見大父母載衣便襲衰含飴未入口  
我有奔喪行旦夕當離此從來異鄉身流落憂生子  
憶昔汝兄生大父未得歸

遭李成  
棟之亂

後來旋歸日肇錫

日姚兒今日思大母欲歸更何時我懷實深痛聊以  
此名之生女人不喜生男我亦悲賢否皆有天離合  
豈無期

和王九青田園雜詩

昔爲宦遊子今爲旅寓人仕止雖不同所同此一身  
有身須有養且爲隴畝民他鄉長兒女猶未識艱辛  
微祿足代耕亦已停廩薪未知卒歲計聊可謀宵晨  
南原秋色好晚涼不妨酌倦來枕鋤臥豐草如綠茵  
雖然不飲酒頭上戴葛巾好語慰童僕怡顏接近鄰  
行藏何所繫丘園任我真

積雨

寥寥三日雨夏月似涼秋雲氣生枕席歸夢故山樓  
醒來遽然驚漂泊在西州我行實永久道途阻且修  
世情多牽引仕路苦淹留壯盛不待人華髮欲盈頭  
童穉亦滿眼益懷羈旅憂歲月英雄淚風塵志士羞  
歸歟行已後湖海負釣舟

夏夜感懷

多病苦三伏披襟坐閒庭高樹動遠響隱隱似秋聲  
中夜不能寐慨然感平生委形造化內倏忽四十齡  
意廣才自疎迄今無所成天道匪思議世故詎能平

李廣不得侯子真豈其卿今我聊養拙疇昔媿營營

五友詠

劉璽

幼宰性情真知心自早歲疾病急難中相依萬里外  
海舟客路長旅豕荒原大人琴慨云亡我生何聊賴

趙岱

公至自翩翩意氣心相許三年蕭寺中連牀聽風雨  
元伯老母在君未獲死所玉折與蘭摧造物不能主

崔越

叔逸本達人沉醉可埋身形骸如土木軒冕等流塵

葬子陶家側骨化釀老春有酒不能飲浮名奚足珍

蘇鳳翔

威寶依繡佛襟期何拂拂連舟扣鳴舷夜靜山月出  
湖海旅棹分風塵歲時疾一別經十年中懷每如失

張子瞻

雲師不漫識論詩能起予斟酌元亮酒棲遲子雲居  
登臨徧華嶽歲月閒漆沮無媿古人交淮陽一紙書  
淮陽事見後

古詩

從得兩少婦恨是解相思人生有離別嬌愛不如癡



雨雪

東臯望雨雪西行怨征車人生實有憾造物將何如  
勞人餽四方志士僵敝廬足下岐千里豈容更躊躇  
人事苟能盡天道亦無餘一朝知有命何必十年書

伏羌縣

我生本東夸陳為舜後東夸之人也流浪出西羌相去千萬里  
懷人天一方貧賤無安居奔走固其常邊州寒氣重  
春半猶飛霜征夫中夜起悽惻歎無裳欲賦履霜曲  
淚落不成章但識中心苦敢辭客路長

登長城望黃河作

長城望不極黃河流不息浩浩風煙闊東海互西域  
安瀾思禹功築愁慨秦力當其侈雄心狹小古人迹  
在德不在險舟中皆敵國扶蘇死塞下閤樂起宮掖  
長城思飲馬臨河歎鳴犢悠悠山與水弔古淚成碧

賦得昌谷竹別何永昭

永昭霞濬別業即李長書昌谷故址

玉樓人已去春筍今誰屬何郎風流在霞濬有新築  
白楊夾深巷梅花出小閣更撫千琅玕青光照昌谷  
念別竹林去琴淒瀟湘曲無情猶有恨斑斑淚相續  
經鳥鼠同穴鳥名鴝鼠名巖冬月鳥毛盡落鼠覆育之巖爾雅作鵞  
我初讀禹貢所聞匪所思今問鳥與鼠同穴意何為

九峰以為  
枝山蓋不

信同穴也  
豈西夏隔  
絕不及詳  
與

爾驥既不貪爾鷄亦不飛制之不在氣牙角共息機  
並育造化內二蟲又何知

曉月

曉月意自孤清光靜若此征人懷遠道未明長早起  
霜氣稜已寒天路淨如水渭橋南渡頭脈脈照遊子

古詩四首寄丹崖

隴山不見日陰雨忽秋殘邊州寄衣晚遊子悲早寒  
挂鏡不敢照引劔亦罷彈長安多貴人通籍縮朱綸  
山林隱逸者服氣餌還丹獨憐失羣鳥西飛鍛羽翰  
又

西都舊帝里吏隱我安之南安羌戎地客子歸何時  
慙無雕鏤質遠謝世人知蘇李有贈荅恩愛兩不疑  
秋風未搖落秋花滿南枝寒芳若有意莫待鬢如絲

又

騷人抱幽憂風人憐秀色詩以言其志性情非外得  
寡和怨孤音歌罷還太息猗蘭在澗谷因君作華飾  
玄圃有瓊枝花開爲我食

又

美人西方來遺我書一編琵琶十七變十七變臨洮張晉獲罪時  
集杜詩作丹崖近以見寄云妮妮百千言集彼杜陵詩譜此明妃

絃非行復非記哀音何纏絲君如段善本思化康崑  
崙我非白司馬青衫淚潺湲

客寧遠縣觀邑人祠關侯有感

長年徇道客無事日徜徉土人祠關侯我亦薦薌香  
當年關與龐苦戰情可傷彼各爲其主委質惜不詳  
聞說令明廟于今久已荒龐德徇道人  
縣有廟今廢人生貴豪傑  
豈必在故鄉

同丹崖遊桂青山 其二

入山自有口出山自有路從八路  
入山一爲山中人徘徊  
不能去新月挂遙峰殘陽隱高樹樵子忘青山淺淡

新月殘陽  
欲出山時

冠憶樵人  
而羨之

不知處

余途中問樵人桂山遠  
近笑而不荅蓋忘之也

秋聲

南山朝出雲英英如輕絮搖曳去人間蒼茫作飛雨  
嘯傲倚庭柯幽人守貞素何處落秋聲修竹交窗戶

愛玉行

義塘壁間有題詩并序云妾不幸幼失雙親遭薄  
倖人所欺嫁咸陽武弁終日戎馬征衣又聞大娘  
很毒此一去不知作何光景也因書一絕於壁望  
知音者憐之詩曰露鬢風鬟亂曉妝澹雲孤月影  
微茫自憐薄命同秋草戎馬鞍頭困海棠常山愛

玉題余憐而和之有後時難作梅花聘此日淵材  
恨海棠之句更作古詩一首命曰愛玉行

父母生妾時愛如掌上珍雙親棄我早委命薄倖人  
淡閨生網絲愁絕向風塵細馬咸陽道三月東風惡  
常山漸不見遙背秦雲哭那識春睡濃胭脂早零落  
征衣如出塞空續明妃曲西行路渺茫回首望義塘  
妾身萬重山妾心半壁間知音世不少應憐此一彈  
去去何所道薄命紅顏老昔日海棠花今日斷腸草  
秋海棠根  
食之斷腸

憶雲師

彈暑罷繙閱坦臥北窗下朝來風雨聲開卷憶同社  
幽獨違自多欣賞趣何寡故人今安在躬耕事東野  
旅夜聞哭

人有一日死必有幾人哭哭人我惡聞哭我我不覺  
今宵臥聽之聊復領其略大都離別意祇分久與促  
又

霜氣曉淒淒星高月漸低澤鴻思舊痛城烏失故栖  
若非文伯母應是杞梁妻我本行路人胡爲與之啼  
早發

半鐸應雞聲知是喚我行僕夫亦夙駕無寐起晨征

轍環非行道經孔子轍環處萬里徇微名力耕曠子職抱關  
媿友生辛勤三十載有志竟未成此中亦有命似非  
吾所能

老子故里

在靈寶縣

玄都滿宇內故里意自親兩山夾嵩華一水帶河津  
青牛歸霄漢紫氣燭周秦古之得道者信知重谷神  
勞心徇耳目利名役其身徒誦五千言得無媿至人

芳樹

天桃生深山顏色爲誰好美人不見采芳菲日枯槁  
因風飄客裳殷勤若有道感此傷華年將隨芳樹老

酬原蘇愚

繁霜淒且惻春風未相識函谷望泉山茫茫無南北  
歸人此時心默默不自得遠攜一杯酒來看萬里客  
倚我別時歌酬君醉後墨

二月旣望早發權歌

天高地自低日東月在西舟帆向南去風雲自北吹

玉清丹鼎

人去留丹鼎鼎去留地名青牛不可見白雲空復情  
墟煙侵暮合潭水到秋清待我婚嫁畢從君學長生  
余高臥舟中髮長未剃適朝日照篷箬間磔磔

然與世所畫達磨無異作詩代偈

誰取佛頭青寫此蝟毛磔一葦渡橫江隻履脚不韞  
試問江上濤何似山中雪

任塗山贊

雙目雖長不見腦後朝日東出有影在首啞然一  
笑是物奚有蓬蓬鬆鬆如蝟如韭高者爲準凹者  
爲口我思古人可得似否達磨少林迦文靈鷲誰  
寫其形在吾左右

揚州懷敬止

敬止詩才好後生誠可畏名卽女子知敬止善醫藥身豈

安邑累池塘曉夢孤春草抽新翠目斷廣陵橋江風  
入寒吹

沂山

岱宗表東土培塿難爲山茲山豈不偉並峙青兗間  
亦如生人傑有孔復有顏

早發

遠心驚旅夢東方天未明霜風吹短袂惻惻似懷冰  
此時萬里客一軫別離情歲序冬已春道路縱復橫  
半生羈旅人席不煖柴荆仲由能負米冀缺能耦耕  
天倫有樂事栖栖竟何成

齊郡懷古

敬仲來奔齊羈旅本失職桓公使爲卿當時豈逆億  
誰知數傳後厚施移人國民歸若流水其君實不德

又

母后有遺命顧待取贖人客子方一言拱手遂入秦  
大夫與司馬空多計謀臣至今松與柏哀歌愴我神

又

六國各自立田氏亦起兵擊楚一何壯降漢一何輕  
食其亡田廣蒯徹烹鄒生英雄不盡死天下不太平  
嗟哉五百人一劍從田橫

有感

富貴終磨滅貧賤難久居不夷不惠間處之意何如  
楚人病鑿柄齊王好吹竽憂生未能達請君更讀書

別李岷瞻

惠好雖未久一見定心期狂風起中夜客子欲何之  
馬蹄多岐路遠遊無盡時

風雪苔周證山

君從大澤來遠挾風雪至驚濤千丈立三山失位置  
得君客中書沉憂無次第何用慰吾子人生本如寄  
老來嬾讀書近日少詩思不如一杯酒疎酌亦徑醉

醒時風雪晴玉山橫晚翠

感懷

服賈本計少爲農筋力疲黽勉從祿仕親老逢歲饑  
一身旣供職盡室亦相隨今年女贅壻明年婦產兒  
生意如瓜蔓難畢婚嫁期鄙人謀旦夕久計誠未知  
東來春色近冰開河水溜松竹對吟哦歲歲長如斯  
人心非木石感慨自係之所思古之人辭尊而居卑

懷周岷公

岷公終賈年騏驥馳千里一跌遂晚收憐才意何已  
詩律能細評禪悅發新旨風雪送君歸悵望掖川涖

冬夜

布被可存身安臥如蟄龍那無紅羅帳開廳待春風

聞柝

寒柝朔風前無衣實可憐夜永如混沌更長似歲年  
東方幾時白北斗正闌干貧守富安寢貧耕富飽餐  
古來皆如此君子復何歎冬宵我擊柝晨門汝抱關

觀海

浩浩無今古巨浪接天浮羨魚我無網濟川我無舟  
三山在何處神僊不可求敝廬滄洲上高臥好歸休  
讀亡名氏古詩十九首



嗟茲十九首萬變出其中當與三百篇天地共始終  
澤蘭與園柳皎月更迴風悲歡感時序相遭亦無窮  
詠歌其性情不琢而自工大名天所祕歸之亡是公

送僧愚者歸闕

與君故鄉人相送異鄉道江海自悠悠歲月何草草  
野鶴與孤雲行蹤無不可出家猶歸家無家獨憐我

捫蝨

征衣不暇澣緼絮日鬢髮曝背茅檐下捫蝨聊自談  
若處天地內寇攘肆奸貪有時用刑戮造物亦無慙  
除害得安寢歸夢到江南

歷下覽古有懷

我行向齊州寒日下原陸遙望煙塵中春城露一角

蓮湧華山青華不注珠噴趵突趵突泉臨淄十萬戶肩

摩車擊轂被紈吹竽笙美人矜妝束霸國氣銷沉形

勝猶在目雍門漫興哀牛山豈常樂妻何必齊姜位

何必方岳酤得杜康酒飲之聊自足濟南有杜康泉

甲寅歲暮作

我身如一器用之五十年若還不愛惜安能久自全  
意氣徒相矜恩愛虛相憐嘉樹旣招伐明膏亦自煎  
勉供牛馬役茲爲世網牽來日苦無多守拙願歸田

徘徊去就間中宵不成眠出岫本無心得失任自然  
賦得大將軍有揖客

武帝重邊功衛青起廝養欲使羣臣拜以爲將軍寵  
偉哉社稷器如山屹不動朝廷存等威百僚俱震聳  
青也雖武人遇之失其勇能保功名終一揖見顧重

濟南寄書萊州余入都門

燕京九百里東萊七百餘歸使猶停泊行人已駕車  
想到都門日家中正看書

晚過小姑山

春草綠於羅春波明似鏡夕陽露晚妝亭亭出閒靚

遙峰永相望近水聊自映彭郎未歸來佇立孤煙暝

渡河

黃河天上來萬里遠奔注我行欲問津嚴程迫日暮  
濁流正崩騰猛風更馮怒傷心名利人不斷風波路  
別有閒居者爲說公無渡

渡淮

清淮本安流濁河橫相委淮旣不受河瀾漫遂他徙  
隄防亦蕩然轉輪借湖水湖水廣且濶風波不時起  
經年苦居人一渡困游子

渡江

渡江

江水何湯湯東西絡吳楚我來駕葉舟長川渺煙雨  
乘風更宵征未知栖泊所秋花發芙蓉春芳老蘭杜  
睠彼涉江人中流權容與

渡湖

西行江水長渡湖意愴怳彭蠡連番陽水天共沆漭  
萬里事孤征臨風發慨慷吳淞竊長沙孫恩據閩廣  
輕舟載西施鴟夷欲安往

讀華蓋山志因題

在崇仁縣浮丘伯及王郭二子成僊處

嘗懷五岳遊碌碌未能至以茲無心中得讀華蓋誌

聞道浮丘伯神靈匪思議安得同二子左右挹其袂  
早有出塵心中為宦婚累人僊事兩存亦各言爾志  
與君將無同授詩解其義

浮丘伯嘗以詩授魯申公

孺子亭

細雨草亭幽高士重南州曾為太守客中心無所求  
一榻懸孤賞千年自寡儔懷人不可見煙柳滿江秋

徐亭煙柳豫章八景之一

讀書樂

人生各有樂我樂在讀書得從叔季後尚覽典墳初  
別自有天地詎敢忽居諸貧賤欲助我患難或起予

中懷覺疎朗物情任毀譽涼風入戶牖清陰滿庭除  
問奇兼載酒不樂將何如所恨涉世故不復得寧居  
素心多聚散中夜起躊躇

病懷

弱質無勁操暗與陰陽馳未夏暑先覺將秋涼已知  
總緣中氣少靡靡隨物移嗟哉此一身所得誠亦微  
役役百年內辛苦復何爲嘗聞古至人先天天不違  
大道難聞見我其問希夷

豫章懷古

豫章絡吳楚名郡表西藩廬岳標高峻章江瀉長源

控楚遜剽勁引吳讓庶繁杭稻雨暘若亦足給饗殮

柰何灌嬰城

郡城灌嬰所築

開門揖虞翻

華歆守豫章孫策使虞翻說降之

下榻禮賢士千載一陳蕃

擬納妾作

衣敝無人紉納妾豈初心聊執堂中帚不彈月下琴  
水亦有清濁情亦有淺深常愛故園竹生筍已成林

吳姬年十五

吳姬年十五字之若嬰兒投懷似飛鳥可憐嬌復癡  
人生重婚媾相遇有速遲小星附明月千載以爲期

春雨

宰相食萬錢朝堂待更鼓  
邑丞無一事小齋臥春雨  
睡起山廚熟豆糜進筍脯

荅李貞吉

茅齋無俗韻端坐興蕭然  
嗜酒不常得撫琴亦無絃  
中有不如意愈讀古人篇  
梅子青如豆荷葉綠似錢  
有客叩我門云是李臨川  
攜手步幽徑雨餘草芊綿  
清機互相引松響荅鳴泉  
燒筍供午飯笑參玉版禪  
興盡君當去閉戶過春天

救月詩

唐人有月蝕詩茲質言之得三韻

陰道本宜斂亢陽反自虧  
匡救我人職奏鼓共奔馳  
重輪依然好蕩蕩仰清輝

泊

日落空江靜扁舟倚邨泊  
雲歸山油油風動林簌簌  
美人夢相尋蘆花淡處宿

舟雨

一雨挾風來蒼茫白晝晦  
不辨雲煙色惟聞天地籟  
遠近無定形各隨心所會  
布帆猶邁征孤舟不可稅  
讀張來儀悼高季迪詩有感因賦

天地能生才亦復能殺之  
縱能死其身不能沒其詩

張羽詩  
消息初傳  
信復疑君  
亡誰更可

風騷繼李杜高啓與楊基遺篇競傳寫何必蔡文姬

番陽舟中不寐作

霧重四山合煙淡一水寒扁舟當晏歲萬里涉風湍  
窗前一樹梅花發正好看醒來不能寐雞聲邨舍殘

泊皖城懷余闕

文山宋丞相自應不仕湖廷心生元代舍元何之乎  
微仲吾左衽聖不與人殊彼分正與閨此言固大誣  
食祿死其事豈容有異圖安肯無定見忘身與妻孥  
廷心詩一身未足惜妻子非無情今人自謂智古人不盡愚長江赴  
海遠高檣倚天孤泊舟臨斷岸澆壘酒一壺

寄贈郭獻素

七年東海客王事各驅馳獻素東海人余宦東萊獻素已仕西江再縮  
西江組覲面慰所思有美其必合相見寧恨遲新詩  
互展對燈前酒一卮行年過五十賦命亦自知豐此  
而嗇彼豈盡由數奇春光轉蘭蕙層岑碧苔滋不盡  
懷人意臨風寄一枝

費長房

重黎絕地天長房迺治鬼不見狎浪人一跌喪於水  
世上無神僊誰能免一死殺鬼鬼殺之爲鬼無彼此

贈袁宣四

相逢驚意外稍覺人面改鬚眉自落落曾懷尚磊磊  
左官如薄遊詩窮文爲罪秋氣日已淡蒼然滿江海  
露濕白蘋花淒涼誰采采袁昂與陳遵千古虛名在  
狂客乏金龜換酒共澆壘

### 聞夜哭

生來父母喜死去妻子悲悲喜發中心歌哭自隨之  
彼情感此情淚下不自知以我窮途慟爲君薤露詩

### 寶應縣

地天本絕通錫寶古無攷天不弔唐家故反愛其道  
禮云天不愛其楚不寶白珩寶應唐珠貝何足寶瑞  
道地不愛其寶

應今何存江水流浩浩

### 聞臬

臬之賊在性臬之醜在形臬之惡在音三者實相成  
既爲人所惡何須晝夜鳴不寐思物理惻然憫羣生  
胡不驚其容胡不驚其聲胡不若慈烏反哺表其誠  
萬類分善惡造物本無情爾獨秉戾氣安能遁爾刑  
臬惡而味美故周人炙之  
漢人羹之天所以殺臬也

### 轉餉至楚買蛋船以渡感之作詩

蛋船江水上亦復眠與餐方知容膝內無處不可安  
不見吾一心方寸如彈丸當其得意時浩如天地寬

山亦自有峰水亦自有瀾人生處世間豈無易與難  
隨波任所適行役何足歎

余坐蛋船而感之因思蛋戶終身船中作蛋船

詩

蛋船江水上亦復嫁與婚

蛋戶相婚男子既娶另居一船終不上著

方知

鳥卵內自有一乾坤

記云天似鳥卵地似卵黃

雖然長兒女終不

計田園潮上泛洲渚日落歸島門舫魚堪換米蘆絮  
有餘温夕陽山色好時復酒一尊老死且不知得失  
安足論

授杖

古人善養怡血氣多充實猶然杖於家年不過五十  
我生本衰羸行年五十七宦拙身自勞征役不遑息  
八月返北燕十月事西夔川黔一線天經旬不見日  
方春雪載塗匍匐倦登陟僕夫授我杖奔走倏而疾  
何須紫竹根豈必白鳩飾止此枯樹枝令我生羽翼  
滿目征戰塵誰憐岐路泣扶持君無苟詎敢忘其力  
莫化爲龍去與我忽相失

抵貴陽

龍標過五谿太白徒夜郎古來騷雅客流落遠投荒  
而我亦何事萬里赴黔陽崕崎歷鳥道陰翳日無光



何堪衰弱質行役征戰場武帝通西夷高宗伐鬼方  
皇王務遠略拓地廣開疆十萬勞披甲千金費饋糧  
自古遠征人何日不思鄉況我事輸輓幸已給軍糧  
歸途見桃李曖曖春日長二月過湘水三月抵豫章

長沙懷古

吳芮分土後幾人據長沙權力在一朝跋扈自矜誇  
智小而圖大終亦覆其家湘流自入漢暮色欲成霞  
我懷賈太傅年少美才華來弔汨羅水不看洛陽花  
壽命本在天早濕何吝嗟賢愚共蒿里啼殺城頭鴉

過長沙懷蔡江門

江門名道憲晉江人長沙司李死張獻忠之難

溫陵稱名郡教育三百年殺身以成仁泯泯何無傳  
惟有蔡江門臨難節凜然獻逆破長沙聞名將脅致  
初焉殺胥徒繼之戮妾侍愈奮常山舌不垂蔚宗淚  
引頸受刀鋸從容就大義小臣死封疆尊官寧無媿  
涉江懷往蹟歎息仰高風君臣恩義薄誰能守孤忠  
遺恨如湘水萬折流向東作詩何必悔聊自寫其衷  
公有詩名  
悔後集

過險

險阻亦已過中心久不怡臨淵實所慎折坂不能辭  
所以楊朱子憫之泣路岐及今投閒好我行無久迷

讀史

春寒覺夜長秉燭讀藏書靜言本諸已涉世乃其餘  
人事實凌競天道有盈虛單于拜渭橋幼主入燕都  
奸雄詐揖遜豪傑顯征誅臯夔與龍比其心本不殊  
從何處說起況添四史乎呼盡子美酒偃臥諸葛廬

送陶石公歸里

少小同里閭一別如風雨各爲四方遊豈不懷鄉土  
浮萍逐澆波時散時復聚清源怨分襟豫章欣筮羽  
攜手步珠宮題詩滿鐵柱石公寓鐵柱觀因君數往來六月  
忘徂暑把袂夏秋風維舟望極浦江樹去悠悠送別

起鄉愁高士不可見懸榻在南州

出門

流水自東去白日亦西馳嗟哉行役子皇皇欲何之  
世事多相左乃非心所期北風正凜冽匹馬向京師  
試問出路飽何如在家飢告歸悔不早伊戚我自貽  
願言公事畢挂冠從此辭

失路

星言已戒途月出未遑宿徬徨岐路間誰憫楊朱哭  
臨淵驚我心迷陽傷吾足家山路自知故轍行當復

車中言懷

泉南有狂客流落在他鄉薄宦久不歸皓然兩鬢蒼  
功業雖無成詩名走四方上下廿一史刪脩歲月長  
談詩無高論只是適性情論史無奇說祇欲是非明  
時命本有限造物難取盈胡爲不知止僕僕困征行  
故園荔支熟蟬螿海味清酒杯閒送老庶幾達我生

曉發

日出散曉霜衿袖更覺冷前路方悠悠客心徒耿耿  
告歸志未堅趨時力不猛世情本難知太行涉峻嶺  
我技亦易窮短綆汲深井況兼氣血衰桑榆逼暮景  
何物重於身吾今發溪省

河淮

淮水自清泚河水自濁流流雖分清濁位並視諸侯  
齊物以不齊善哉漆園周尚有涇與渭彼此無相尤

滕文公行井田處

滕文誠所重時勢不可爲井田雖不廣良法誠足師  
自秦開阡陌仁政何所施至今遂不復太息路傍碑

汶上縣

曾見閔子祠對句清風吹汶水  
明月照蘆花甚佳附記於此

汶水自滔滔侵星過板橋昔辭季氏邑今駕使臣輶  
賢士有特操弓車豈能招聖人達權變行可立其朝  
二者我無一升斗以自饒奔走亦已倦髣髴蕭蕭

我其投檄去歸期今不遙

東平州

聞昔好土風騎驢來阮公屏障不相隔內外盡開通  
今我到何晚寒衞疲長坂風土亦尋常南望思故鄉

東阿早發

狂風吹孤月風怒月自明遑遑中夜發豈敢憚征行  
月落風亦止已過三十里駟馬若飛星單車如流水  
昨日發汶陽今宵指高唐尚有善歌否一曲散愁腸

曉征

孤月照繁霜清涼堪濯魄若非曉征人此景應不識

寒威發旦氣浩然亦自得酣歌醉夢中誤盡英雄客

惡夢

杯酒起戈矛親故變仇讎夢境雖云幻致此或有由  
周禮贈惡夢今人久不脩精神多妄用魂魄無所收  
怔營起中夜觸處成讐尤至人無夢想我或非其儔  
閉閣思補過庶不爲身羞

望西山

輶車入燕趙莽莽平蕪間奇峰出雲表遙望識西山  
橫亙數百里蒼翠何鬱盤帝王建都會必有名山川  
茲山雖非岳嵩華可齊觀王氣之所鍾地脈自綿延

生才如申甫與國爲藩翰我來征役倦落落無所歡  
恍如見親友一笑解愁顏

微雪晝臥作

朔雪下燕臺風人感羈旅諒無遊賞歡祇益寒威苦  
僵臥學袁安布被煖如許夢裏楊花飛蝴蝶共栩栩

感懷

薄俸不自給轉徙到盱江

攝建昌司馬

亂後民更罷胡爲

來此邦山雨連日夜檐下水淙淙羈客動愁心慙慙  
未可降嘹唳野鶴孤呢喃燕子雙鄉近不得歸空懷  
建水艤浪說麻姑酒酸醜徒滿缸解憂欲何向仍對

讀書窗

蘭舫上巳小集

小齋傍竹樹宛在水中央風來疑纜動月出恍波光  
上巳接清明會稽今豫章蘭亭人已遠曲水仍飛觴  
春光行復暮勝會詎可常頽然獨先醉願君恕老狂  
晚步訪心壁上人不至

雪後夕陽佳散步何朗朗射圃歷花洲

余住射圃亭

所見

多秀爽渡橋倚石闌湖光平如掌隔水望雲菴  
心壁伊人致可想面壁入定心此時方寂養况兼足力  
微獨來仍獨往歸對讀書燈幽懷猶怏怏爲我謝湯

休新句自堪賞不爲興盡還還來過方丈

夏日諸同人過北蘭寺澹師留粥列岫亭分瓜  
字

初夏風日好引侶過僧家北蘭列岫亭圖畫信莫加  
遠山青欲滴長江浩無涯上人喜留客江水煮山茶  
香積惟白粥時物有黃瓜逍遙杖屨外別自有其佳  
低徊未能去前邨夕陽斜

### 巫山高

王母處崑崙神女居巫山山中太岑寂一夜思人間  
亦有長蛾眉非無細腰身不知楚宮妾何如夢裏人

### 擬鹿鳴鷹揚兩宴詩

小雅歌鳴鹿大雅歌揚鷹人才期上進取義宴諸生  
名姓登天府人生意所期文舉世推重孝廉稱漢時  
武舉未可輕唐有郭子儀子儀武舉持此荅君恩勸汝酒  
一卮

### 月夜聞砧

羈人夜不眠搔首看明月何處擣寒砧聲聲轉淒切  
塞雁嘶已遙寺鐘響亦滅霜中靜更聞風外疎未歇  
無端最感人感此授衣節

### 別馬證山

平生寡交游寂莫守章句海內亦多賢知音不我遇  
要非無其人落落猶堪數五君詠已成劉璽趙岱崔  
瞻三友傳亦具蔣薰李日晚得嚴與周嚴允肇披心  
見情愫金石不獨堅膠漆可同固我既沉下僚君亦  
老道路何處寄愁心嶺雲江頭樹晏歲逢西昌驚喜  
出吾慮欲哭則不可欲言難盡吐一別十九年人生  
能幾度忽接應門書早晚君當去才子志四方驪歌  
候已賦老友戀窮交別詩不忍作開春是前期草堂  
十日住文史細叅評應識素心趣

文昌閣聽琴

高閣迴參天何處出響泉四座皆寂靜聽琴之所宜  
心手默自得聲情相往還我本屬神賞初非因耳傳  
絲桐有妙理吾師憶成連

江省三都事

元伯顏子中

中書分行省其制自元始外相體既尊都官勢亦起  
子中澹無事旦夕親圖史惟能輕利名所以達生死  
子中後  
死難

明黃道周

自從撫軍設方岳權遂輕都曹謫宦窟優游養聲名

石齋大臣節投荒爲此行鸞鳳偶栖宿枳棘被光榮

本朝陳允錫

石齋能直諫伯顏能死節而我何所爲屈首受經術  
國有文學臣豈必皆簪筆勿云都無事語云非都事乃都無事  
單心事則一

歸家作

夢歸心亦喜何況是真歸拙宦三十載不知幾是非  
靜言念往事危途甘息機躬耕有薄地幸不至寒飢  
敝廬雖近市族姓舊相依只如原不仕豈失老布衣  
經史滿架在興來堪發揮有子能讀書亦足嗣音徽

平昔閒居志茲日幸無違

江文通

衰老才情少造物有乘除欲無失其故惟有常讀書  
文士當權勢或怠於暮年豈真有錦筆夢中人索還

贈丹崖

分手當衰老不易是前期況復閩越遙山川或間之  
生離卽死別丹崖別詩語揮涕讀君詩相見真望外百杯  
亦不辭

南浦橋懷江文通

文通博雅人當日宰吳興文章飾政術喜無俗吏稱



由來愴恨事皆從離別生綠波與碧草長留南浦亭  
傷心何時盡今古同一情

### 悼子常

汝生本弱植時常厯吾慮果然致天傷中道舍我去  
汝既未知學不識養生務我復憐衰病每多姑息處  
當其撫枕時汝亦自知誤此過當平分教督非有素  
老母空啼猿幼子如飛鸞魂兮若有知安能不同顧  
遺恨向誰言老淚濕詩句

### 滬濱懷古示子善

滬濱今上海縣

大海環東南倏忽通萬里物產既繁多疆界亦遠被

海濱廣斥地長城爲之倚上下千年間治亂固有是  
不見東晉時吳國袁內史正歌行路難忽覺飄風起  
形勢控吳淞爰脩滬濱壘萬姓可憑依此身任成毀  
我今詠古蹟酒酣未能已川匯別有城邑有川沙魚  
南匯二城  
鹽更成市九峰雲外高獨鶴沙邊徙九峰鶴沙  
皆邑別名百里  
堪寄命亦在其人耳治譜寧可傳神明存乎子

### 題宋中丞淡淨軒

限淡淨二韻

退食非無處異境以人淡闇智雖自昔高騫良在今  
石瘦延古色樹密移遠陰政暇時來茲悠然可會心  
當前皆美景入耳卽清音或有南州士嘉惠肯相尋

萬竹餘蕭爽把臂堪入林

又

高臺藹如春曲池明似鏡朝來海色佳虛白相輝映  
大邦非無事雲行水不競閒步鶴鷗邊微吟發孤詠  
千秋託立言萬民觀爲政勝地能移情抑亦存其性  
相對一怡然荷花共幽淨

荅錢東陽二首

騷雅本公器當與世共之以君能知我不殊我自知  
幽谷蘭蕙芳東風遠相吹素交人自醉不在把酒卮  
來詩有賡歌進酒  
答我在生之語

又

鹽官與當湖東陽鹽官人原自一邑分承乏在他日懷刻  
不及門今朝能相念直道信在人桃李豈須言花開  
照上春

又題小像

謂是僧伽像謂是美人圖看經不須有讀史不可無  
輕綃如秋水照影本空虛

過姜維故里

當歸苦未得敢曰不當歸遠志猶之可小草誠自非  
亦有爲徐庶亦有爲姜維種麥不成穗阪田我餘悲

臺齋詩刪卷二

七言古

擬行路難

寒角轉沉沉冬宵似海深同夢人何處孤枕怨重衾  
憂能傷人不自惜長無樂兮生何益瀉水平地有時  
乾千古共悲行路難

琴歌

琴歌二章悼亡妻蔡氏也

嗚呼兮噫嘻萬里征夫兮猶還舍深閨一去兮更不  
歸



嗚呼兮噫嘻十載流人兮猶還里深閨一去兮更不歸

鐵牛歌

蒲州西郭有鐵牛四相傳地卽黃河唐玄宗造浮橋鑄牛以維鐵鎖今河流改道故址猶存感此作歌  
曾聞金牛開蜀道更見鐵牛鎮蒲關牛眠芳草未能起河流他徙不復還滄海桑田君眼見堪嗟微名歷州縣經過摩挲歲月深黑光如鏡照人面

織錦臺

織錦臺邊樹色秋織錦臺下漳川流樹織寒煙波織水織作幽閨一段愁新人歌舞真無比棄婦文章更心死若使儂作竇連波字字付與陽臺歌而今輕絃久斷絕絡緯尋絲聲曲折想見當時擲梭人徘徊曾照空臺月

與丹崖論詩作

少小學詩三十年遠望終古意茫然無名誰氏十九首尼父刪後三百篇此如開闢有天地爲莫之爲致莫致蘇李曹劉不乏人李杜王孟亦清真尺有所短寸有長元聲大雅不終亡前吾弗及後弗聞皇皇求

丹崖詩挹  
將秋水洗  
我篇采取  
春華潤君  
筆風騷未  
喪豈多門  
河梁下  
兼文質數

語甚佳

友誠殷勤遠遊作客向金城把臂相看其眼明誰似  
春花顏色新誰似秋水有遠神試將塞北牢騷句持  
訪江南風雅人

放歌

十年別母鬢髮白十年別弟鬚頰蒼十年別妻歸黃  
土十年別子如我長半在秦中半閩中少婦別我意  
萬重嬌兒弱女泣相向問我泉水路何從辭秦歸閩  
未到家迢遙八千道路賒半世功名成底事三處相  
思天一涯

送王子側歸新城

君客東萊已復秋問余幾度往同遊今朝忽聞賦將  
歸使我泫然欲濕衣一番離別一番老別時何似見  
時好盡日相見亦尋常欲別始覺愁人腸雨餘芳草  
送征鞍秋色遙連海外山君贈紈扇留詩在我賦驪  
歌逐子還天涯長是存知己何況二東猶接趾

長歌四章

嗚呼兮無家可歸山川是兮人代非敝廬承爍兮先  
壟傾欹我縱還兮欲何依

嗚呼兮有子難教三男兒兮筆墨總不好多病成癩  
兮寡學長傲我亦庭訓未遑兮中心自悼

嗚呼兮十年不調鉛刀一割兮思自效秦關抱燬兮  
齊柝擊破賓戲嘲兮主人臥  
嗚呼兮一身將老年半百兮何草草日月易邁兮立  
名不早中夜思之兮驚懷抱

商彝歌

疊齋居士頗好古俸錢不滿二百五漢書奉錢二百四十三代  
法器充文房區區收拾亦良苦萬物遭逢各有時不  
獲周鼎獲商彝我有金雞與黃流虎頭百乳尤瓌奇  
余有三彝曰雞彝黃彝百乳虎彝六彝宗器博其三流丹點漆更拖  
藍自喜山雷堪娛老何須田宅可分男曾記兩執贈

張黃

余別有兩彝贈張受菴黃俞維

在此在彼總不妨天生神物有

合散寧必拘拘爲我藏良辰典衣沽斗酒折簡幽齋  
招我友摩挲鑒賞笑顏開官卑祿薄亦何有當年清  
廟共趨踰元后穆穆相皇皇莫道淪落遭幹棄斐几  
長伴典籍光款識辨文誰所創父癸西伯與姜望雕  
鐫易質漸趨文思得寶鼎相輝映

送袁松籬歸山

長白在西菑水東中有幽人十畝宮不學阿世公孫  
子菑水願事乘風白兔翁長白乘風偶爾落掖河陳孟對  
飲復高歌客中重九黃花少海上三山青眼多青眼

渡邊看離別西風垂垂欲下雪袁安暫作僵臥人世  
亂豈容身獨潔潔身濟世各有宜仕隱無成最堪悲  
惆悵山中君到日是我邊塞出門時

爲趙石寅題張式如小影

建安才子張式如芳年十六頗有餘盡日西窗笑讀  
書有時前溪學釣魚春風拂拂颺輕裾翠袖青袍綠  
草舒豔如朝日灼芙蕖不數玉樹兼果車東萊狂客  
瞥見初魂銷目斷眇愁余但願一傍美人居生生死  
死猶空虛詎期幽夢到華胥半簾殘月映星疎永好  
木瓜報瓊琚可憐蒹葭倚璠璣幾許欲別轉躊躇水

盡山迴更攬袪精魂夢裏兩相於片影隨君到草廬  
別後相對獨欷歔遙將離恨訴居諸衿佩翩翩來何  
徐含睇不語最憐渠邀得同人題綺疏彷彿香風動  
玉除

典衣沽酒

會題時余  
將入都

沽酒典衣事不疑若非閏年春到遲今朝已是送春  
時況復人生有別離共謀一醉又何知

過四知堂有感

萊子當年自爲國兩漢以來初置吏清白太守楊伯  
起凜凜四知質天地遺事千秋何寂寥空懷昔人却

金處雖無其事存其意堂上高懸三大字

有懷

年年爲客憶江南身到江南望江北寄家東萊由來聚散事難料當時何苦離鄉國

憶補兒

五十生子如生孫異鄉悲喜難具論生來數月始相見懷抱幾日又出門聰明冰雪真吾子不得見之心愁煩願汝長成吾老健荷鋪相從藝故園

徐聖佑爲其母節婦龔氏乞言贈詩

騷人獨坐意黯然有客叩門投長箋一披讀之實堪

憐徐媛芳年正嬋娟良人不幸相背捐便擬從君之九泉三尺孤兒懼不全欲奪其志母也天誓死無他終不遷春花春草如飛烟江城三月泣杜鵑水槩於今五十年節烈之事世所賢不必因詩始能傳聊備采風陳一篇

蠓磯夫人廟

夫人者權之妹備之妻也廟在磯畔舟行過此感之作詩

孫劉旣非好相識安能終始不相棄數月伉儷雖不終自矢此生無他志妹可絕婚妻可出兄難相違夫



難忘侍婢凜凜帶刀劍中心淒切自斷腸宗婦何堪  
作繼室從來叵信是劉郎石螺鳴咽子規叫采石磯  
頭望瞿塘

贈李君對

織錦臺邊送君行遊子依依萬里情鬱孤臺畔見君  
面故人鬚髮已如霰心事欲言有萬千人生幾箇三  
十年

泊雞鳴關

在清浪衛

清浪西去雞鳴關舟隨山轉似連環陸程十里水三  
十晚泊依然見前山洪流喧豗何奔激細泉鳴咽更

潺湲萬里征夫夜不寐起來照見鬢絲斑

憶補兒

諸男亂後多荒廢晚景方思教幼兒七齡正好課讀  
書王事逼我更驅馳夢中相見亦授經諄諄足見老  
人情雖然賢否皆有命相近大抵中人性人不從師  
豈自明木不從繩豈自正轉輸畢事早歸來黃卷青  
箱向曉開率先且盡父兄責繼起應須子弟才

南湖驚浪

三月清明天驟熱濃雲颶風一時發驚浪如山高突  
兀小舟漂溺大舟沒嗟余材質本疎慵隨流轉徙更

西東五十餘年湖海客不知幾度風波厄堪歎存亡  
在咫尺泊岸艤船收魂魄亦有不懼措皇恩金文亦  
有危坐誠敬存程伊川亦有沽酒醉漁邨唐子方亦有面  
壁贖辛勤洪釋德我歸面壁贖辛勤

花見羞

即王淑妃

花見羞今劉非昔劉初爲劉鄩寵妾後劉知遠殺之薄命私錢不買  
死母子相看血淚流

余過鄒嶧山遇大風雪作孤桐二章以歌之

嶧陽孤桐何嗟峨天風相吹將奈何  
嶧陽孤桐百尺許霜雪欺人君自主

松聲

猶憶鍾陵署齋老松樹日坐其下不能去何處淙淙  
出響泉知是助我吟哦趣乍如洶湧鼓洪濤又似飄  
蕭吹細雨古榦無聲忽有聲爲誰故作不平鳴澗底  
鬱鬱能無感古詩鬱鬱澗底松一夜秋來使人驚偃蹇不受  
大夫封落落無夢到三公一丘一壑是吾素石闌橋  
畔拂清風柯葉不改直至今歲寒應自有知心暮靄  
朝嵐山水靜時時自作老龍吟

斬蛇詩

并序

余薇省幕署亂後傾圮鵲巢鳩居久不可問自張

朱諸君以來非一日也江右舊有錢局久不鼓鑄  
蓬蒿滿屋余借寓焉有蛇長數尺出入梁間其色  
微紫文若花綬後徑緣至堂壁余欲除之或曰此  
紫微蛇也主財不可殺余不以爲然命子健劔斬  
之自是經年不見一錢或以爲言余曰劉季斬蛇  
而王叔敖斬蛇而相余固非效此然貧富豐嗇本  
自有命何至乞靈於蟲蛇哉旣爲說以開其惑并  
系以詩

先主吏隱獨無亭泉府局中借老屋廢署荒涼久鏽  
扃庭除胥爲茂草鞠紫綬文蛇竄其中巨額修鱗尾  
半秃初來屋脊乍跳梁旋向壁間常撲朔小兒十八  
膽氣豪鹿盧一揮錦文落不見鱗甲曉飛翻更無睛  
光夜閃爍周官泉布九州通度支奉詔脩舊局行將  
地上見錢流安在乞靈向汝族不圖夜月隨珠來遑  
恤秋郊鬼母哭

賦得巫山一片雲送趙墨林入都

自昔巫山有神女朝爲行雲暮行雨可憐倏忽遇飄  
風吹雲直向燕山去楚水燕山路渺茫欲別未別斷  
人腸華燭青尊忍相送夢中攜手託高唐

秋月篇

天上明月四時逢一到秋來便不同四壁金商乍撼  
樹一輪玉鏡正當空人世驚秋易爲感天上明月亦  
何有閨中少婦自斷腸塞外征夫空回首初照牛女  
渡河時七銀漢橫天澹澹垂流光夜半暫收歇長蛾  
不忍看別離中秋桂子拾天香八共說今宵分外光  
亦多顧影共游行豈無引領遙相望九月姮娥可耐  
寒蟾光兔影白團團滿地霜華浸黃菊人瘦不堪月  
裏看濯魄冰壺清如水瓊樓高處傷獨倚已是淒清  
玉露零況加蕭瑟涼風起庭下嚶嚶喚草蟲天邊歷  
歷度征鴻舍得明月房中去自憐孤影對殘缸春霜

夜墜猶淒切夏雲暮起愁炎熱冬宵冰雪誰出門惟  
有秋月最明澈見月思家本人情更兼秋氣日夜清  
早晚乘秋他夕至攜手相將看月明

澄心亭觀釣

亭與百花洲相接  
本蘇雲卿祠堂

百花洲下水泠泠誰人把釣澄心亭原非釣名與釣  
國不得不賣稱吾情近而觀之釣乃直應知漁父是  
雲卿

與李野仙談養生

微官遠世情閒坐說養生養生只是生自養不傷其  
生生日長若待談時識養生其不談時生何往

和高澹人大雪竟日用歐陽永叔韻仍禁不使  
皓潔白素等字

小園尋梅初破萼徒倚轉訝衣裳薄蕭蕭颯颯自天  
來同雲迴風更大作萬物收斂歸寂靜此心空洞對  
寥廓江天一色眼界寬寒光飄忽來相鑠雰雰飛灑  
滿亭臺脈脈平鋪徧邨落飛禽走獸沒無蹤正好共  
睡一丘貉續紛毛羽落遙空疑是蘇耽鶴爪攫閒庭  
煙暝噪饑鳥空林凍合墜啁雀枯枿槎枒石齒滑騷  
人難躡遊山屨薄宦老態似孤僧天涯對景亦無樂  
篝火讀書費鑽研自銷餅水苦茗淪顧我詩興近已

慵羨君老將方橫槩舍却故步學邯鄲聊與先生資  
一噓

餅中臘梅

臘亦作蠟

破臘寒梅別有花恰似佳人在溪谷幽芳密意自相  
親插向膽餅一枝足暗香陣陣侵書卷瘦影亭亭入  
酒杯蠟丸夜報春風至東閣官梅相映開

別駿公壻兼懷敬愛二子

駿公往山東敬在燕愛赴省試

曾約夏月噉荔支今向秋風試龍眼行止遲速那由  
人歲月推移自剡剡登臨又是送將歸黯然相看把  
酒殘歸去山東梨棗熟隨在土風與物產文舉燕齊

路匪遙德祖三山若門限丈夫聚散亦何常只有令  
名堪久長

江郎石

羣山赴浙若奔湍江郎陡立蒼崖巔削成問誰借斧  
斤青光紫氣發自然白雲起處疑袖去紅日開時忽  
飛還聞道蘊合種地仙一枝一榦皆柗榭丹砂竈中  
遊赤鯉薜荔木末采青蓮有時三石只一山來往分  
合總無端壁上觚稜翠欲滴洞中鍾乳玉成環人間  
空說天工巧欲訪支機不可攀使我再拜具袍笏大  
呼石丈真奇觀

讀律曆志感賦

闔闢下至獲麟歲二百七十六萬年獲麟迄今二千  
祀人事不知幾變遷自茲以往無窮極誰能識其所  
以然我生其間僅百載何啻九牛一毛焉人生浪隨  
造物轉亦如羣蟻逐磨旋磨磚作鏡枉學佛服藥誤  
人謾求仙德行自慙顏閔後功名不在房杜前區區  
此老號詩史余號詩史翁或者微名與其傳

五言律

觀音寺登眺

亂水小橋斷荒園曲徑閒  
松門開白浪埕影出青山  
野艇隨鷗遠孤雲帶鶴還  
虎溪相送晚初月照禪關  
落花

風定雨收後籬邊問落花  
白沙微徑淨芳草夕陽斜  
楚客傷啼鴉  
楚溪憶浣紗  
故園歸未得  
新句送年華  
除夕

誰能當此夜萬里不懷歸  
節物溥天是土風異地非  
春如新客至愁與故人依  
旅館孤燈照羈心暗自違

又

遙憶故鄉事貧家生趣微應知握斗粟更是典麤衣  
寒去窮仍在春來人不歸客宵強一醉別夢好相依

聞更

朔氣沉殘月危城送漏聲迢迢難及曉淒斷不分明  
鴻雁三秋夜江湖萬里情清宵恨少寐頭白聽寒更

哭公毅楊先生

泉路歸良友浮生失故人所傷親哭子尊人考菴在堂幸有

主知臣特贈中書舍人萬鎰輕揮手一官難及身州西過別

墅叩策淚霑巾

先生與家父訂交時錫方周歲晚年不耽下問有詩紀之魯國男子復見君前交陳

絕後陳羣蓋寶錄也

過劉二旅墓哭之

孤冢沒荒草寒潮入翠微嗚呼季子墓慘澹越江磯  
生已無家別魂今何適歸伯倫荷鍤意此日諒無違

重過霞圃

比我昔年至那能不慨然花猶開梓澤石已去平泉  
疎落社前雨散耕門外田春陰原野暮寂莫起寒烟

送拙樵煉師歸劔州

樵客看基返山中今幾年秋風吹別緒新月照歸船  
寶劔終當合還丹惜未傳解帆茅舍日應在菊花前

自饒平復之潮州有感而作



顧我思偕隱誰人好遠遊桑麻山縣熟橘柚粵江秋  
一月無三醉十詩有九愁近鄉歸未得馬首更潮州

午日

隨俗揚其波無書投汨羅天尊問不可人美思如何  
命短牽絲續身長俯戶過攜將蒲節酒去聽采蓮歌  
難後與顓弟齋中讀書

多難身猶在秋齋更讀書交遊歸有處圖史散無餘  
志在聲名外心當媿悔初汝兄近日事小弟意何如

夢崔越

北征道中

哭君盡一慟更欲哭誰人爾死亦何恨我生自不

驚風吹夢短落月破愁新莫近山陽路笛聲易愴神  
首二語當合三友傳看

峽江

衆水朝宗處

峽爲海門

扁舟破浪來長江天地限積峽鬼

神開京國路千里鄉關酒一杯蒼涼懷古意暮色入

南臺

地名舊越王臺

雨

雲起四山黑斜光返照明遠村收樹色急雨落江聲  
空感平生遇誰知失路情傷心極目處新漲沒蕪城

晴

溜落細涓涓前溪誰埽烟秋波明白鳥晚樹咽玄蟬  
節變陰晴裏舟行竹石邊遙峰青未了恍與故山連

雨

山斷南轅道潮溪北渡愁可憐肅羽雁不似忘機鷗  
歸夢鎖江閣陰雲藏壑舟險難來獨後風雨倍離憂  
暮經西湖僅櫂小舟從湧金門至昭慶寺

雲起半陰晴涼風桂櫂輕浪翻夕照動堤鎖晚烟橫  
臨水淡歸思看山遠世情三潭香過處野寺送鐘聲

又

湖山有約在終擬泛虛舟烟月且相待行藏不自由

平沙團落日小漲入新秋風景不殊昔長歌起暮愁

江夜

江水流殘暑山光散夕陰繁蟲秋意早遠樹暝烟淡  
誰共茲宵月獨憐萬里心何年一片影照別到如今

病

高興更何在癯然一病夫授衣先九月去櫂滯三吳  
江海悲窮路鬼神苦腐儒驚風破夢處秋水滿平湖

揚子江

天衢通北極地勢就東傾日月懸吳楚風濤卷旆旌  
焦山秋色遠瓜步晚潮平形勝空餘險英雄不復生

愁絕

愁絕倚船扉川光落照微江颿連夜去林鳥望巢歸  
往路知何極來情覺昨非西風吹病客孤寄欲誰依

淮舟有感

多雨淮流漲孤舟上自難秋風吹建業曉日望長安  
小草宦情薄遠遊親舍單近來新病後絺葛怯輕寒

月

七夕淮陽舟中

江月依然好客愁幾度新何時雙照處今夜獨眠人  
桂發淮南樹星稀河漢津露華飛不覺坐久滿衣巾

從役

從役冰初解中途露已華淹留人事有風雨客程賒  
一病幾無我三秋不見家江南山水地堅臥負烟霞

桃源縣

桃源猶可問此地愛其名車馬風塵路桑麻雞犬情  
隨人自適取如我且孤征春水二三月花開亦滿城  
舟夜

山色迷前浦湖烟接近林高秋蘇病客新月引鄉心  
幽感臨風淚抽思流水吟虛舟多遠響寒柝間疎砧  
中秋

欲作中宵坐未勝風露侵北來天闕近南去海雲深

萬里河山影一輪離別心明年人月在清滿好如今

臨清晚泊

榷政雖云濁水流本自清荆揚千里舶煙火萬家城  
細雨河魚出斜風塞雁橫同舟哀倦客漸近說王程  
舟至天津

王畿采衛設海國遠波連蜃蛤魚鹽利東西南北船  
水行初出地日近忽瞻天漸喜客程盡到來賓雁前  
樊橋道中

驅馬悠悠去不知何日還巫峰冷楚夢函谷抱秦關  
微雪催殘歲夕陽下遠山勞勞橋上客橋下水流閒

旅夜

蘿月照蒼苔西風吹夢回天長征雁急霜近草蟲催  
多難違初志微官媿不才秦川五載客淚盡菊花開  
送汪彥倫之閩中

送君遊我里憐我幾時歸水旱傳鄉信風霜換旅衣  
菊隨秋雨盡雁背夕陽飛攜手同車好堪嗟心事違  
京兆別黃婁上余時入都

此別最爲難窮冬雨雪寒天涯俱失路當日本同官  
馬色蒲關曉雞聲函谷關東風吹客舍兩地憶長安  
轉餉宿蒲坂

入晉水流折辭秦山色分泛舟今有役歲晚渡河汾  
將母違初願服官敢憚勤我行經雨雪猶喜被南熏

蒲州有南熏臺

懷雲師

余觀古人之交司馬侯可與事君范巨卿堪以告  
母心竊慕之出歲閩中水災家書不至身羈西土  
淚盡南天雲師時在揚州訪得老母平安信自淮  
海寄京師轉達扶風數千里以遺我真古人也余  
長跪讀罷念雲師高堂老矣遠遊不歸與余徇祿  
萬里母子各天情事相類蓋實有不獲已也謹往

淮揚到秦中者少故轉寄燕京

廣陵爲我寄此謝之

羈束未能去飄零幾日歸高堂臨老淚遊子出門衣  
貧賤輕爲別艱難何所依廣陵秋雁斷吟望送斜暉  
送劉東需攜家客渭陽

堤頭柳色新堤畔展征輪何處堪爲別他鄉欲暮春  
一官似作客十口更依人漆水將清淚隨君到渭濱

雨後

一夜終南雨兩河散白波漳河年來生趣少秋至旅  
情多落日靜禾黍寒風疎薜蘿故山有舊約心事歎

蹉跎

聽雨憶弟

浙瀝灑遙空蒼茫愁思中他年共聽雨今夜獨扶風  
濁酒斟頻冷孤燈暈不紅對牀虛舊約糊口各西東  
將發茂陵賦別二首

折腰來漢輔徒步出周畿奉檄他年事奔喪此日歸  
隴雲侵暮合陵樹向秋稀別路分攜處蕭蕭候雁飛

又

陽城政下下定遠語平平古道分秋色新詩留夏聲  
青山環暮驛衰草滿荒城渭水隨人去滔滔離別情

別周紫海

四十人將老七年官更貧依依客裏別草草夢中

烟柳春猶短雪梅曉倍新魚書欲有寄瀟水不通秦

擬從漢口歸閩

又

春夏秋冬況

余候代一年

東西南北人宦情已可見交誼

本相因騷雅留他日窮愁隨此身寒燈一夜話俱是

厭風塵

客寧遠縣登樓

臨郭千山合背城一水流杏花空自笑護草未忘憂  
伏枕人多病登高客易愁杜陵流寓近風景接秦州

秦州有杜  
甫草堂

別甯誠懸

叩角發商歌知音不遇何水聲人共咽山色雁同過  
別路悲楊柳歸期負薜蘿離尊須盡醉回首暮雲多  
同乾行落門寺樓飲別存茹性至在寧遠縣

送別一杯酒登樓萬里身雲霞移暮色花鳥亂殘春  
目斷青絲騎心隨白錦鱗長亭楊柳路淒絕隴頭人

首陽山

在隴西

仰止高山在斯人今已徂君臣存杞宋兄弟見黃虞  
孤竹家何戀采薇路不殊河東有首陽山所求亦既得無事

更嗟吁

別李君對之滇南

同年多拙宦憐汝獨勞人薊北三秋客滇南萬里身  
彩雲過白帝落日泣孤臣惆悵徇微祿送君華髮新  
贈蔣聞大

蘭州

庾信詩名久知君鬢已蒼鴛湖烟雨隴隴坂歲時長  
方外豈無友醉中亦有鄉素心慰晚暮何必早登堂  
薄遊今更遠辛苦向蘭州積石高低見導河積石卽此洮河  
日夜流飛花春盡恨芳草路旁愁極目風烟闊籌邊

萬里樓

睡起讀書

上策惟高枕中年嬾讀書興來一散帙佳處更悠如  
白日戶庭寂清風帷幄虛吾生未得逸且勿負閒居  
獨坐

獨坐空齋曉輕寒憶敝裘竹聲分小徑柳色積溪溝  
對我惟青卷懷人早白頭故園歸未得風雨又新秋

荅李野果

南海烟波接野果潮州人西州旅寓同銜杯方昨日把袂  
已秋風栖老碧梧樹歌殘丹桂叢故山別業在惆悵

歲時空

和丹崖借柳居詩

南邨歸未得丹崖家南邨五柳卽吾廬風過涼堪引月來  
影不除杯揮一士醉詩命故人書林竹開三徑清陰  
共翳如一士翳如俱見陶集

雨

隴外初秋雨江南十月天淡山收燕麥近水種葑田  
榆柳垂沙路村墟上晚烟無衣出塞客悽愴薄寒前  
別黃婁上

涼吹動蕭晨河橋望去輪未須論到里且喜得離秦



朝雨泥征路暮雲黯別津邊城留滯客灑淚寄歸人  
途中九日作

秋深喜未寒御袂試征鞍綠樹烟中出黃花雨後殘  
攜來桑落酒吹去籜皮冠不少登高興雲山滿眼看  
不寐

水黑魚龍臥天空雁鶩飛孤身仍旅夜殘夢欲誰依  
反側何時盡漂流未得歸故山松桂在歲晚客心違

沙泥驛

沙泥驛路遠望望塞雲間哀壑催人淚征塵厚客顏  
鴻飛遵夕渚馬足響秋山旅夜愁風雨郵亭淡閉關

南安雜詩

田畝半山椒人居在復窳吏愁日少暇民苦政多條  
西望甘涼晚東歸江漢遙寒風吹早雪霜鬢共蕭蕭  
對雪懷丹崖

十見關西雪羈懷難具陳殘書空照夜臘酒未開春  
客對青山冷詩同白髮新剡溪可乘興何必洛陽人

鮑照對雪會得兩少妾俱是洛陽人  
丹崖詩雖無洛陽妾寧似僵臥人

和乾行逢女騎作

脈脈路旁子盈盈馬上人金鞭垂素手玉勒挽輕身  
香起後塵雪堤橫一道春含情回首處墜翠綠楊津

遊桂山還經馬力坡

瑟瑟溪風發蕭蕭送客還平坡延眺望亂水去潺湲  
野老牛衣穩遊人馬足閒尋詩共蹠躩落葉響空山  
宿張秀才園懷桂山

來往中峰路言尋日涉園寒雲擁古樹新月破孤村  
前去城烟近回看山色昏應知今夕夢尚繞桃花源  
不寐

一宵失美睡四野起邊聲易感此孤客難齊是物情  
夷歌唱月落戍角咽霜清巷哭鄰雞早紛紛入五更  
荅丹崖

騷雅推君舊交遊得我新越閩千里道旅宦一時人  
聚首嗟何暮歸期數及春登堂終不易相過莫辭頻

客夜

一歲行將盡羈人未得歸寒淡酒味薄夜永燭光微  
山雪對開卷寺鐘到掩扉逃禪應不異所媿未忘機  
留別乾行

交情何處見別路更相親孤鶴歸飛晚雙龍分羽新  
移梅方點雪收秫待燒春不盡今朝興留懷去後人  
荅丹崖別步韻

君出子卿塞我窮阮籍途北風歸思切落日旅情孤

隴水流嗚咽羌山望有無還鄉難結伴灑淚寄征夫

十二月十六夜與丹崖聯句

今宵真是別錫獨我不能歸相見原非望薰他鄉何

所依殘年疑夜短錫疎酌到星稀萬里關山遠薰一

鞭行色微錫

秦州道中懷丹崖作

秦州行在望回首憶羌中揮手分寒色離心逐曉風  
長亭只自去孤館與誰同欲寄相思淚渭流故向東

重過王氏園二首

秋色前山合川光夕照收偶因今日至重恨昔年遊

斑竹湘娥老薜蘿山鬼幽主人曾幾醉花樹近高樓

又

涉園猶有趣載酒更無期細菊依三徑殘荷覆半池  
石寒孤影瘦竹密遠陰移斜谷東流水池引斜谷殷勤語

舊時

代別

別離意萬千憔悴望君憐愁是送歸後又如未見前  
歸自隴外淡閨無日月遠道有風煙一夜相思夢迢

隨故國還

宿涇陽有感

萬里泉山路三宵涇水邊淒涼悲北客惆悵望南天  
人到燒燈後時逢鬪草前春光怨逆旅春思待明年

高陵早發

繁霜侵曉落孤客戴星行  
菜甲輕尖出柳眉淺暈生  
渭雲渡處濕陵樹望中明  
惻惻春寒透王孫離別情

出關

短衣匹馬去曉色亂雞聲  
渭水北流盡渭水至此入河岳雲  
西望平功名簿領薄行李  
雪霜清春草送歸路萋萋  
最有情

雨後

周原新雨後村塢物閒閒  
征馬猶然去歸人相引還  
雲光低晚照風色澹春山  
沾得鄰翁酒飄零暫解顏

郊縣道中

周畿定九鼎漢輔出孤臣  
重器亦淪沒微官漫苦辛  
襄江分往路郊爲吳楚分途岳雨送歸人  
野店杏花發斷腸  
故國春

過東坡頽濱墓

生在谿山下死歸汝水濱  
斯丘成萬古誰氏更三人  
季子堪觀葬要離何必鄰  
春風抽宿草弔古淚霑巾

許州

鄉路望雲遠歸心羨水流新楊鶯子嫩古木杜鵑愁  
逐鹿人安在曹孟德載馳賦未休許穆夫人賦梨花寒食  
近細雨濕征裘

遇雨

遇雨亦常事未須添客愁衣霑猶可著書濕獨難收  
度隴方梅雪到江已麥秋何堪向萬里逆旅更淹留

亳州

亳州古商都當年纘禹謨三宗繩祖武九有式皇圖  
地勢近通豫江流遠帶吳詠歌懷舊德萬里一征夫  
不寐

殘燈伴不寐倦客耿歸心渭北暮雲合江東落葉深  
安仁添白髮季子盡黃金反側隨孤枕松窗月影侵

夜渡江

南紀滔天水北來飛渡舟聞雞當夜半擊楫在中流  
闔海通潮汐揚州共女牛月明寒照廣風露滿貂裘

露筋祠

遺祠訪露筋亂水齧孤邨蓮藕水肌色桃花血縷痕  
熏風難解愠夜月不歸魂何事千年後碧紗護曉昏

秣陵贈綠厓姪

延佇愁三編余在六合遲綠厓不至睽違憶十年春風函谷路

白浪浦江船入幕嗟吾德建牙推汝賢雅歌應不廢  
試誦別來篇

歸過揚子江

風急晚潮生雲霞落照明石航浮水直玉岫隔江橫  
返櫂歸何暮中流氣未平烟波有釣叟好與定鷗盟  
僚友沈夏卿今爲嚴州司倉舟過桐江不及相  
訪賦此懷之

委吏非高隱憐君傍釣臺只知分野隔那識故人來  
殘照春江外孤城雲樹隈杳然乘興盡一似剡溪回

江山縣

浙閩  
分界

驛路分巖邑歸途向近關閩天多阻障越地限江山  
無恙片帆落倦飛一鳥還仙霞接建水來往鬢毛斑

課子善并懷力兒

力時六歲在  
秦中未歸

庭訓不聞久蹉跎今幾年只因五斗米淡負一經傳  
拙宦思能子薄收望晚困方名又失教六年教之遠  
數與方名  
道隔風烟

青湖逢蔡孺人忌日有懷

全家就祿仕惟汝不同來縱有一杯酒應難到夜臺  
蕙帷別鶴怨霞嶺斷猿哀楓樹長江水香魂渡幾回  
送善兒之秦中取寄琴

函關萬里程迢遞汝孤征爲欲三兒聚不辭一子行  
天寒短褐薄身弱蹇驢輕雖曰四方志其如此日情  
酒醒有懷

俸薄猶耽酒公餘亦看書不妨稱小隱所恨是離居  
叢菊半含吐殘荷自卷舒開簾秋氣入風露滿前除

又

酒醒無限意默默與誰言霜月明殘夜秋風吹故園  
砌蟲宵織冷城角曉聲繁余美天南北斷腸清渭源  
余寄孛渭陽未至

禰正平

座上賦堪賞懷中刺不通漁陽聲坎坎鸚鵡樹葱葱  
尺椀萬人廢二兒一死同何嘗非大雅千載起英風

幽夢

黛鎖春山曲波橫秋水長釵梁栖燕子裙帶結鴛鴦  
玉質猶含璞蘭心早返芳巫峰今不遠齊右有高唐

濟南清明

短馭步多窘長吟興自在清明三月夜桃李百花香  
客路都門道歸心濟水傍典衣沽美酒一醉荅年光

荅張恂臣

不知歷下亭幾度訪君行節物私花柳詩文共友生

失時同感遇岐路各關情似解伊人意嚶嚶春鳥鳴

又

嘖嘖復嘖嘖

歎息也

行行重行行

離別也

四海負知己一

官老狂生劉伶名是酒伯輿死爲情與君潦倒意聊作不平鳴

步韻荅恫臣別

自有江淹賦銷魂今幾何玄亭方問字駒路更聞歌  
客酒憐春夜歸心逐逝波不知身到處何以別離多

又

若論班荆好年時亦有人流萍難聚首折柳易傷神

顏色屋梁月馳驅驛路塵從來交友意賴是不羞貧

對雪懷丹崖

萊州

朔雪下紛紛飛花徧海濱和烟白更遠兼雨冷難分  
寡和誰憐我相思獨有君吟成欲寄遠高興託寒雲

七夕聞笛和王子側韻

佳期度翠輶駉望倚朱櫺何與人間事爭看牛女星  
中宵橫短笛餘怨入青冥莫遣天孫聽空教別淚零

秋齋雨坐

散吏靜無事兼之秋雨中哀絃吟蟋蟀蒼榦老梧桐  
近日相知少昔人不遇同故園書未寄目斷送歸鴻



懷丹崖乾行敬止

何處尋三友誰人識古狂乾坤風雅貴憂患歲時長  
魯酒不堪醉吳吟祇自傷相期吾道在千里若同堂

元夕歷山以詩招飲步韻荅之

元夕復何如回頭憶歲除祇因時序速遂致往來疎  
月色花間酒春盤雪後蔬南樓興不淺折簡報君書

雜興

睡起讀殘書輕寒覺雨餘堪憐多暇日幸不怨離居  
礎潤苔花冷窗明樹影疎倦來欲自慰笑憶酒尊虛

原韻荅任薛公

宦情如水澹詩興與雲閒臥聽鄰雞叫坐看飛鳥還  
烹茶融積雪開卷對寒山比屋有任昉蕭條共閉關

行役錄別詩

室謫兼王事慙慙賦北門春風愁折柳夜月倦開尊  
獨往依形影相思託夢魂簡書人所畏分手更何言

晦夜

直北關河遠橫林驛路昏疎星遙積水寒柝急孤村  
倦翮羨歸鳥迴腸泣斷猿王孫怨已極更有怨王孫

題純陽樓

在趵突泉上

湧雪傍三島燒丹憶九還早知人世澹長與道心閒

倚檻當斜日登樓見遠山清流堪洗耳何事苦潺湲

禹城縣

當日疏排處城今託禹名地平山隱勢河遠水無聲  
殘邑餘三戶衝途達兩京緬懷艱食苦瘠薄且溪耕

重陽前一日作

忽憶重陽近蕭蕭海雁過微官猶偃蹇半世已蹉跎  
荒徑竹松老虛窗風雨多我生何寂莫把酒一長歌

題西野幻傳奇

女郎江月白失所飲恨死葬西野後尸解去孫國  
南作因駿公求詩為題近體一首

江月白如霜江聲流恨長妝成三顧影歌罷九迴腸  
蘭玉易銷隕神仙亦渺茫人天歸一幻野色晚蒼蒼

旱蝗同諸公步禱作

滂沱未可定炎熾正當空野哭千村外陌塵彌望中  
天何惜一雨年尚可成豐誰敢忘憂畏飛蝗徧海東  
十二月得丹崖汾州寄書及詩春初余亦有字

到南村

心悲別路長隴首復汾陽故里幾時到同人盡可傷  
書言乾行迴風新操曲明月遠流光亦有相思字歸  
遷謫始末  
僧寄草堂

冬日過任塗山南郭別業

咫尺城南路經時冷綠苔雪泥堪壅竹風信欲催梅  
投老親經卷留歡共酒杯滄洲寒色暮烟鎖武皇臺

漢武幸臺在萊州南郭

送張中懋歸里

萬里依貧仕堪憐初念違不能留客住何敢怨君歸  
淮甸多春水江程黯暮暉折腰豈我願已覺昨來非

別岷公歸越

一官辭劇邑千里訪庭闈鄉樹雲間出征鴻雪裏飛  
年年憐我老日日送人歸惆悵別君後天涯朋舊稀

又

且莫賦驪歌春水尚凍河獨歸芳草騎相送夕陽坡  
風雅如君少窮愁到處多離魂識別路鑑水舊曾過

送曹振子歸閩

仕路應難說歸心祇自悲何須問產業

振子以乍喜累變產

見妻兒傍馬楊花落維舟荔子垂石倉風雅在

乃伯能始

有石倉園詩相送起遐思

初秋

入幕雖云暇居心自不閒多年慙吏隱何處是家山  
白髮鏡中滿滄洲夢裏還騷人搖落恨秋至每相關

七夕

名愛今宵好涼生一夜秋世間爭乞巧天上說離愁  
玉漏靜方永銀灣澹自流誰人私語處纖月挂西樓

答嚴修人二首

客情原自冷風雪更殘冬蝶夢驚街鼓烏啼應寺鐘  
歲時憐獨老湖海乍相逢預恐分衿去天涯離怨重

又

堪歎論交日共當旅食年何必哀時命

嚴夫子

且學灌

園田

陳子仲

茅屋青燈火松窗白雪篇蕭條梁父意歸

老筍江邊

修人詩

山城春色裏雲氣晚蕭疎綠樹聞啼鳥滄洲學釣  
魚柳條風外折菜甲雨中舒却憶文園客閒居獨  
著書

得丹崖書云已歸南村近頗老健兼寄郎君文  
字

長懷隴外別今得越中書以子家園日憐吾患難餘  
詩人知老健文種喜扶疎更說南村好素心可卜居  
東萊春日雜詠步黃鱗伯韻六首

歸期空計日旅館又逢春竹葉開新釀梅花憶故人

歲時須一醉湖海止孤身白髮東風裏水盤媿五辛

又

聊託幽居暇殘書素業存猶懷一物恥敢道百城尊  
院靜鳥聲樂圃香花氣溫偶然吟弄去此意與誰論

又

素壁舊琴在無絃不事張木棉寒尚峭布幔日初長  
海月流新照山花送遠香應門沽酒至疎酌散愁腸

又

旅食靜無事茅齋晝掩關忘機對白鳥閒夢到青山  
好友長離索新詩暫往還紫芝春更秀幽谷一怡顏

又

居官無所見作客復何爲風浪愁難渡家山未可移

時閩中  
歌變

魚龍騰夜雨桃杏發新枝野老寂寥甚潛行

江曲時

又

昨宵風過處疎雨擁雷輕綠竹含春粉白雲散曉英  
耕桑客處計婚嫁老來情曾作太丘長兒童識姓名

避地東萊經尚父故居感賦

傳聞東海畔舊是太公居出獵原非虎坐茅不在魚  
風雲多變幻潮汐有盈虛南國難歸去東溟且結廬

亡友秋濤之子武生崔惛延宿舊館將發遇雨

感賦題壁

拜親閩海日見子萊山時舊德猶堪食美人不可思  
幽蘭換故葉細柳發新枝再到添吾老歸情雨意遲

新秋

澤國秋風早殊鄉旅客悲歲年漸老大身世各艱危  
海近潮聲急天空月色遲平居搖落感白社故人知

竹影

猗猗常鑑水策策更搖風萬點亂青瑣千尋寫碧空  
醉吟夕照外高臥月明中幾許閒庭夜幽人散步同

賦得名士悅傾城

亦自不分明獨深一往情佳人難再得名士豈虛生

夜月琴中語

司馬長卿

春湖鏡裏行

范少伯

誰能合趙璧猶

復惜秦城

賦得看劍引杯長

豪氣渾難平霜鋒未發劍興來呼白墮閒去倚青萍  
年老心猶壯愁多醉不醒中宵望牛斗寒月滿空庭

老驥

老驥來何所流沙霜雪淡從軍千里足報主一生心  
短馭憐他日長驅好及今暮年烈士感漫擊唾壺吟

浴佛

錫少時曾見先大父浴佛詩猶記首二語今續成之

人天朝浴佛隨喜也飯僧清淨六龍水光明一點燈  
無生今日始正覺及時興亦是洗兒說獨能不垢稱

南歸

南行當徂暑客子獨心寒爲有兵戈阻豈惟道路難  
黃河決巨口青犢揭長竿旅櫬搖搖發孤兒技淚看  
又

鹿車躬自挽不幸昔人同

先父亦扶祖母喪歸里

南渡家何遠

東征事不終

曹大家從子之官作東征賦

草心難報日樹葉恨搖

風海岳浮雲隔哀哀泣斷鴻

三月三日清明登樓

上巳卽清明時光不暫停髮非今日白柳是去年青  
郭外看花騎湖中載酒舸小樓聊縱望隨意亦蘭亭


蘓子美滄浪亭

中丞宋公重建

傲歌易見忌南去得滄浪白鳥窺沙渚青松纜野航  
尺書報持國片石付歐陽別自有知我千年待表章  
白明遠見召賦謝

海國淨風埃將軍綺席開酒任飛巨白花欲起重臺

牡丹名論時相接繁絃不用催病夫易潦倒時有暮  
盛開小恙  
色早歸來





臧齋詩刪卷三

五言律

毘陵舟中

無窮芳草岸風雨送孤舟  
佐領慙貧仕江湖笑薄遊  
鷗羣如舊識燕子說新愁  
閒倚篷窗坐浪花打白頭  
將入都門答鱗伯別

八千里外客五十一年身  
聊學關門尹空懷谷口真  
周旋寧作我少壯不如人  
溪柳休攀折老來方怕春  
又

征鞍連別騎倏忽過前村  
新句呵冰寫濁醪敲火溫

漁莊閒白日驢背恐黃昏東國通京路相思寄一言

聞鳩感懷

鳴鳩雨後喚咫尺似園林霜霰變玄髮緇塵染素衿  
好音適爾性歸思感余心何必戾天翰入山恨不淡  
不寐書懷

一雨孤眠冷中宵覆短袍驚鳥啼繞樹饑馬怒翻槽  
十口家爲累百年生本勞雄心隨歲減湖海不能豪  
憶威寶

祇爲分衿易遂成見面難西風吹短棹幾日到長安  
沙渚雁聲斷亭臯木葉寒相思何處所籬菊看將殘

登毘盧閣

高閣帝城隈登臨霽色開香山環拱在霸水邈迤來  
宋玉思千里仲宣賦七哀故鄉不可望目斷鳥飛回  
閩中有歌  
逆之變

張桓侯廟

桃李自芳菲交情千古稀涿山生氣在閩水夜魂歸  
一念扶龍種五臣列虎威至今桑梓地廟祀有光輝

石門子路廟

栖遲偶一夕廟貌遂千秋齊鄭君何在  
齊侯鄭伯關  
盟于石門  
門石尚留鳴雞人起早策蹇我行悠來往有誰記前

宵宿鄭州

除夕宿商家林

修途疲旅客向晚雪霜侵一歲餘今夕他鄉愁此心  
青燈照不寐濁酒勸孤斟萍梗家何在不堪憶舊林

宿日照縣

山城僻海隅極望旅懷孤驚雉穿林起疲驢上阪呼  
桑榆留夕照井邑向陽烏倦客經三宿自知賣酒壚

苦雨

累月愁淋雨迅雷日夜驚天如西北漏地欲東南傾  
去歲仍憂旱三年已苦兵原田荒欲盡播穀尚催耕

又

商羊愁起舞江鶴漫長鳴故國千山遠微官一葉輕  
魚真生釜竈飯不飽藜羹誰挽銀河水天心或洗兵

晚景卽事

日影上蒼苔新涼進一杯草堂聊可息蔬圃未能栽  
蟬噪秋聲入蟲鳴暮色催寒塘不數武

塘在署左鵝鳴自

歸來

過玉版居

在福勝寺後前令黃貞父建今廢竹亦無存

正是黃花節來尋玉版居草侵行處路苔沒壁間書  
山水當時興琴尊舊雨餘竹林有聚散祇樹本空虛

憶子健

愛汝倍諸子應憐是再生十齡依乳母三度改新名  
初名常以多病改名健又名更新只願長無恙未知能有成平安書  
兩字看罷不勝情

鍾陵雨夜憶補兒母子

積雨千山暗殘燈半榻餘難平今日事細讀古人書  
有命何孤我無知最憶渠扁舟八月下相見說離居

憶詩姪

父亡已可痛母嫁更堪憐去婦亦猶死孤兒安得全  
攻城破邑後受凍忍饑年萬里分升斗何時遠汝前

聞善兒病

人來聞汝病把筆不成書終歲營微祿何時返舊廬  
誰知百里地相隔十旬餘展轉不能寐山風野寺虛  
哭侯壻可大

余與維屏少小同學許以息女字其子可大後余  
薄宦東西侯壻在家受室已八年矣閩中底定可  
大千里跋涉晤余鍾陵蓋是舅甥始識面也旋往  
會城染寒疾七日而歿哀痛之餘輓以二詩

締媼爲舊德覲面似新知風鶴驚聞後鄉關初到時  
衛郎原不壽楚客自多悲一夕秋風起吹殘玉樹枝

又

修短雖由命如君最可哀高堂髮欲素弱息歲方孩  
故國無書寄溪閨有夢回人生無限事看此盡成灰

別德稱舅

兵後肯來訪尊前忍說歸還鄉路不遠惜別意多違  
嶺樹密於束溪帆遄若飛故園難共去惟有夢相依

和李子文

梅花雪欲盡桃樹火初然曼倩吏堪隱希夷睡卽仙  
有書伴白日無酒過春天綠綺塵封久朝來乍拂絃  
善兒之齊攜家未至有懷

春雨不能晴攜家萬里行何時發海甸幾日抵江城  
貧仕就升斗長途畏甲兵計程應不遠瞻望更關情  
苦雨

苦雨在鍾陵閒愁有長卿抱關二十載破屋一孤城

麩米餅常罄橡樟

卽豫章

葉漫榮古來貧仕者知不異

吾情

東萊書到知內人一病幾危賦此

開函驚復喜憐汝再生身豈料經年別幾爲隔世人  
江風吹病骨春雨黯離神溪媿霸陵隱淒涼出爲貧  
題子力所寄文字

父道本親賢

禮曰父之於子親賢而下無能

書來一蹶然紫囊更舊

習素業得新篇自媿未能教勿云皆有天乘時須勸

勉明歲是丁年

十五年

舒文節

芬祠

科名未足重忠孝始為尊華表鶴無語豐碑龜有痕

筍江公謫宦

公謫泉州市舶

壇石我登門

壇石進邑望山

瞻仰一興

慨斯人直道存

傅丞相

冠祠俱在進賢縣

國破家難保南奔不返轅公誠能一死人豈必多言

或以逃

先達有遺烈及門任負恩偶因讀野史展詞

李元仲傳云公逃建陽山中為門人江亨龍所賣既見獲欲降

慰幽魂

又雨

之公曰而不聞文丞相乎吾鄉之先達也

江郡兵荒後民生賴有年未知造物意漫較雨晴天

米湧廬陵價俸裁方朔錢長歌商頌在聲出應流泉

卸甲居

鍾陵北郭免兒岡相傳伍子胥奔吳於此卸甲埋

兵書其下監利聶尹作廟題曰同里某立

寢戈千載恨解甲片時居荆楚覆無日勾吳霸有餘

防身帶寶劔斫地穴丹書國士自堪仰何須藉里閭

轉餉南安

輸輓固吾分敢辭道路長軍興方貴粟祿仕已休糧  
奉文遠水寒烟白旱田衰草黃寄孥三十口梅嶺望  
裁俸南昌

中秋

玩月在山城錦江相映明  
安仁縣一名錦江雲移樓閣影風  
度管絃聲夜色淡更靜秋光萬里晴故園回首處淒  
切不勝情

晉興野人獻乾梅鹽芥

肉食由來鄙果蔬列我傍齒因梅子軟心識菜根香  
野老能相念家園久欲荒秋風猶未至張翰已思鄉

苦雨

豫章天漏雨十日九滂沱暑氣雖憐薄陰雲更苦多  
霧昏饑虎豹水漲喜黿鼉裹飯誰相餉鼓琴且獨歌

浮石

在安仁界水漲不沒疑能浮云

卷石幾春秋淺深任水流終年無損益與世共沉浮  
漂浪生蒼蘚隨波狎白鷗錦江一日長應否載歸舟

別神賞舅

南國兵荒後君來看抱關無衣同短褐有酒慰衰顏  
雨漲建溪水暑蒸霞嶺山家園荔子熟歸客及時還

采石磯

巨石枕長江登臨意未降波聲撼日月松影靜旛幢  
遣興詩盈卷破愁酒滿缸錦袍誰共泛高臥白門雙  
正月望夜有懷

攜別記元夕幽思不可尋遙知明月夜共此憶歸心  
斷岸含空影疎林散碧陰清光千萬頃流恨與誰深

守壩

運河水涸築壩  
挑淺禁止舟行

浮河供職貢余解本  
色入都守壩困關津如處圍城裏似行  
絕塞人沙鷗晴狎浪岸柳日移春獨我無聊甚長歌

沂水濱

又

待渡臺莊驛淒涼一月餘天寒兼雨雪地遠接青徐  
何處賒黃酒誰能烹白魚更無遣悶計依舊讀殘書

謁三皇祠

不圖下邑地乃有上皇祠網罟開艱食衣裳繼儷皮  
茅茨遮老屋棟柏養新枝拜舞心俱遠如遊太古時  
龍王廟登眺

汶水中流下漕河南北分青油屯虎旅紺殿禮龍君  
短岸風沙禿溪春草木醺登高聊寫恨敢曰趙衰文  
開河驛

三旬疲守壩今日抵開河楊柳春風軟菰蒲新水多



來思依北闕歸去過南訛久役嗟吾老當杯一放歌

### 泊武城

從來文學士能有愛民心當此兵戈日獨聞絃誦音

春波縈晚渡

春波渡在城南

芳草接遙岑維艇古城下懷人

一水深

### 至潞河

潞河流曲沙岸繞溪灣前往疑無路後看似隔山

龍蛇蟠地軸

河本神龍所開

筐篚達天關尚有北風發南歸

及早還

### 楊村驛

判年辭楚甸咫尺望京華跋涉獨行路飄零何處家  
風聲驚白浪日色慘黃沙滿日悲荒旱無情桃李花

### 七夕有懷

忍淚過三節今宵又早秋微涼生遠岫有美在高樓  
牛女憐相見羈人黯獨愁鵲橋不可渡奉使泛虛舟

### 濟寧州

南去十三郡

十三府至泉州

東來第一州

入山東首

孤舟新

病起漕水漸通流

水始順流

絃板商人夜雨風客子秋苦

無濟勝具臥作岱宗遊

### 楚江遠望

六月水平堤天邊綠樹齊人歸燕市北帆指楚江西  
蝸舍黃魚出蟻封白鳥啼憑闌一眺望旅思遠淒淒

題重修滕王閣

高閣罹兵燹遊觀興索然西山慘若睡

郭熙傳冬山慘澹若睡

南浦澹無煙天意隨人事今朝見昔年不知王子後  
作賦有誰傳

分宜縣

山色南來秀溪流北去清殘民依廢壘倦客望孤城  
適楚路方始歸閩計未成鄉人來送酒疎酌散羈情

宜春臺

一水奔吳去羣山入楚來不從萬里役那上最高臺  
朔氣蒼鷹擊霜威白雁哀春風猶未到臨眺意難裁

插嶺關

無情山下路分楚復分吳劃地水流斷插天嶺勢孤  
江淹傷別賦阮籍哭窮途去去休回首鄉關隔五湖

醴陵縣

殘邑無城郭人居山谷間醴流通漢水插嶺抵江關  
幕府猶征戰參軍豈顧閒客行方未已蕭颯鬢毛斑

楓門山

奇觀忘險峻冰雪擁林臯石筍參天直丹楓拔地高

橫橋通棧道曲水激波濤應有巖栖客笑余征役勞

苗江感役

苗江下楚水江源出苗洞楓嶺入蠻天夷洞千林匝王程

一線牽于振空自衛符節幾時還周禮門關用符節自是人

皆智非真我獨賢

聞制臺前進黔首初駐平溪轉餉軍前聞已進貴陽

已歷三千里何妨再幾程從來天下路總是世間行  
敢惜衰頹質休傷離別情當年不奉檄今日豈從征  
不寐

稍眠更不寐展轉倚匡牀只是抽思亂非關冬夜長

江聲偏到枕月色自依梁倦極仍思睡僕夫已戒裝

沅州

交衢通五驛一州五驛僻壤雜三苗禁旅兵戎聚郊垌民

物周久辭薇省幕喜說豫章橋州橋江西人所建又向滇黔

去春風客路遙

沅江

不歷沅江險焉知行路難水淡九老洞石激大王灘  
黔省程猶遠春風夜更寒只爲生計拙辛苦戀微官

除夕

今宵何處宿古驛枕魚磯積雪明虛室淒風透薄衣

酒杯聊獨進客意莫相違一自出門日早知未得歸

又

何處無除夕淒涼黔楚關歸情逐遠水旅夢落荒山  
又是一年盡未知何日閒春風不我待昨夜已先還

前一日  
立春

元日

寒隨川路盡春逐旅人來黔水事將竣西江首重回  
山亭無雪擁溪塢有梅開況復逢佳節辛盤進一杯

平越道中

客心不自聊日日陟岵巖奇境忽開眼危途忘折腰

石城關索寨金鏡葛僊橋更說多名酒亂來景物凋

楊柳亭

離亭楊柳陌待渡喚漁船秋至零偏早春來綠最先  
青門勸進酒白馬代遺鞭回首河橋別臨風意惘然

夜過廬州南原

平野浩茫茫當年舊戰場兵爭今始息行役我偏忙  
一月積水層冰白寒原枯草黃宵征迷望眼鬼火似  
燈光

早發

籃輿挾兩騎倒載月中行夢裏青山過枕邊流水鳴

朝光將向白霜氣有餘清憑軾起危坐自傷孤客情

月夜渡黃河感賦

玉鏡照金波乘風一葦過王程催客路天塹限星河  
老去搔華髮狂來發浩歌未須哀馬援慷慨意猶多

界河驛

鄒滕二縣界

征車迢遞過遠水落寒波齊魯分千里鄒滕界一河  
井田原坦直嶧岫自嵯峨何處忘羈旅見聞遺事多

長至

鳳管葭灰動龍池梅蕊開授時三統建輯瑞九州來  
帝德日俱永天文斗乍回聊充下國使敢說大夫才

贈孫維姪

悵望竹林別欣逢燕市遊一官初到日雙鬢欲成秋  
守拙吾將隱多才世所求猶堪爲善政百里古諸侯

和阮疇生弔鄭哲信墳原韻

不知翔鶴處今在釣魚臺寒水煙波渺荒山松栝哀  
世情原自澹泉路獨先回惟有應劉輩區區幾度來

擬歸

人才膺上選鄉國改儒員

親王督師闈中余以人才考試上等應授廳縣以本

省改德化教諭

邑佐更秦楚都曹老歲年何曾投白刃不用

納青錢

時多以投誠援納得官

宦況已堪識歸耕負郭田

阿膠

不識阿膠貴請詢帶下醫井泉通濟水山木采桑枝  
龍餅印成後印作龍鳳餅以充貢蛤珠火足時細君應一笑曼  
倩遠相貽

宿浦口

暫息征車困到來一似歸山光猶繚繞日景欲熹微  
浦酒釀初熟江魚膾乍肥明朝白浪裏又挂片帆飛  
過東流縣哭力兒三首

豈忍重經過傳聞事不同力兒失舟有傳為北船所拾不獲歸者故余詩有重耳雖出奔返國自有期曹沫縱敗北復地不難為儻有歸來日及我未死時之語今至東流訪之乃妄傳

也痛哉猿啼悲嶺月鶴唳愴江風積雪閉天北余來自燕窮

途哭水東川流猶到海遺恨幾時終

又

目眇東流縣心疑汝尚存今朝知果死前日是虛言  
難問水濱信空招江上魂哀傷如始沒腸斷過黃昏

又

憐汝實無罪代吾挽鹿車一身雖墜水先櫬幸歸家  
力扶先母櫬至東流失舟不救先孤艇歲將暮寒江  
櫬浮水抵岸獲全歸葬詳余年譜日欲斜人生忠與孝何必讓懷沙

哀僕蔡升升隨力兒溺於江

因果事難期在日長齋今生遂至斯塞鴻飛不渡嶺狄叫  
何悲弱子終吾託遺魂想有知何堪風雨夕重過楚  
江湄

吳城雙忠廟

昔時係宋衛茲日主江湖白浪浮天闊青山拔地孤  
表箋今報楚余賚捧還舟楫本通吳涉險存忠信明神相  
鑒無

東風

東風依舊至蓬戶鳥聲歡猶喜詩篇在莫辭酒盞乾  
乏錢餘局署余住錢局無事有都官隱几翛然覺門前春

意闌

寄蔣丹崖二首

頗聞君近況老健似當時綠酒猶堪醉白鳩不用支  
橫山含晚翠長水入春陂風物西莊好意行吟小詩

又

新詩頻寄我只當往來書隴外逢梅使江頭餽鯉魚  
誰能工筆札更問好田廬擬卜南村宅相鄰蔣詡居  
寄蘇威寶

幼安浮海遠長倩抱關遠咫尺書方達十年人始歸  
素交怡晚景家食息危機不負當時約蘇門共采薇

代閨夢

西舍秋雲起中庭白露溥良人薊北去夜夜夢長安  
別緒風吹斷歸魂月照寒誰知衾枕裏行路自艱難

茶憶

故山春事早新莢已驚雷十里露芽白一泓泉脈開  
香草行將盡佳人寄未來文園故病渴鄉思更相催

過北蘭寺

鬱紆通小徑寂絕似溪林生色遠山畫無絃流水琴  
知人到此地如我起禪心回首望江郭風埃自陸沉

早朝

問夜心常警聞鐘神已飛江湖瞻魏闕咫尺儼天威  
志願臯夔比中情時世違朝回歸冷署依舊掩書幃

題李萬衍峨松集

集中備載松事且云  
桐廬有九節松甚奇

萬松相響蒼聲落苦吟中冷冷覆春雪颼颼度晚風  
有心依九節無夢到三公不受人間暑知君宦況同

寒食

又逢寒食節榆柳試煙新積雨蕭蕭晚飛花冉冉春  
燧皇千古事介子一時人冷酌他鄉酒疎狂任我真  
迎送夜還宿石亭寺聽雨

自盡微官禮知非高士心小舟破浪急古寺閉門深



不速分禪榻依然見道林城笳響不到一夜海潮音

送周九一兼寄乃公証山

見君似我友廿載憶分攜梅雨漲章水蘭風送剡溪  
應知維去掉恰好響歸蹄稍待園居定新詩寄品題  
証山多  
客遊

和韻答李敬生

宦冷非今始詩窮自昔然好眠消白晝無賦問青天  
衰老任吾拙英華喜汝賢升沉誰復計論定有他年  
休僧送新發藕芽因求種法

白蓮出雪藕來自虎溪濱閒似休官者澹如出世人

作書問種法釀酒待花辰露墜粉香後又憐玉臂新

舞鶴

籠柵應知困稻梁不羨肥寒空猶未唳雲海似將飛  
誰奏霓裳曲自翻玉羽衣連翩如振鷺勸我醉言歸  
嗔阮秋潭并慰其子于嶼

苜蓿亦何戀君今竟卒官回思曾旅見拜起覺艱難  
桃李春風發竹林月夜寒舊書猶可讀世業此中寬

初夜

新月光猶澹稀疎星斗橫門前寒犬吠籬下暗蟲鳴  
老去知人事閒來得我情迢然心共遠山寺送鐘聲

殘臘中丞宋公贈光賦謝

開府分清俸微官助養廉朝餐炊白線晚食繼紅尖  
線尖俱 栗烈寒威重崢嶸歲事兼忍饑人尚有吾意  
光名 在窮簷

歲暮對雪步中丞公韻二首

雨雪滿西山殘冬一概然老來誰苦讀倦去欲高眠  
瀾漫疑無地鴻濛別有天孤齋堪寄興何事剡溪船

又

行復近新正寒威若有稜不知清冷署何似水雲僧  
薄薄三杯酒青青一點燈陽春思強和鐵硯已成冰

竹屏和韻

湘竹織桃花文房曲曲遮綺疏信莫並筠素自交加  
縹緲生輕霧菁葱映曉霞芙蓉亦浪說翡翠未須誇

林檎和韻

原可推佳果何須出上林相貽憐五色  
林檎有五色 欲報  
媿兼金摹倣存名帖  
右軍有來禽帖 甘香集異禽芝蘭同臭味君子自知欽

遊青雲浦梅仙祠經汪氏園歸  
梅仙漢梅福

何處尋芳好梅仙祠最佳論人千古意撫景一時懷  
白水猶堪酌青雲不可階汪園將看竹更扳蹋春鞵

遊石亭寺

古寺城闌近公餘遊不難山高猶帶雪春半乍驚寒  
廣殿經行緩危樓送目寬江聲流不盡亭畔說韋丹  
亭唐觀察  
韋丹建

蟋蟀吟

小物依時至悲歡事不齊王褒頌聖主杜甫憶山妻  
疎響秋聲徹微吟月色低憐渠能和我唧唧草堂西

贈沈友聖七十

七十亦常有如君可曰稀呼乾新滑酒著盡故鄉衣  
言不爲人厭心寧與世違秋光題詠徧不帶錦囊歸

壬申暮春高澹人邀同周屺公謝維賢并見善  
遊北墅用屺公韻四首

新晴當雨後時運屬遊人

陶詩時運  
遊莫春也

曲曲通三徑幽

幽絕四鄰東山高臥穩北海到門頻疎酌便成醉來  
朝欲送春

又

高人善位置勝事不寥寥花落飛紅雨觴流趁綠潮  
鶯歌學宛轉鶴步伴逍遙登涉渾忘倦瀛山隔水招  
紅雨軒瀛山  
皆墅中勝

又

玄亭問異字金谷賞名花有酒真如海及門卽似家  
高談翻峽浪客傲寄煙霞正擬尋源去前村日已斜

又

偶然動逸興幽趣最堪多謝客遊山屐周郎顧曲歌  
晴雲舒晚岫新月挂煙蘿返棹穿花柳他時許再過

將賦歸過南村與丹崖別

一官似作客又別蔣村歸共酌合歡酒丹崖以合歡釀酒云可久

壽故人意不違夕陽明野艇秋水滿漁磯開卷見顏  
色莫嗟握手稀

哭張中懋丈

八口餘孤影百年歸一空生涯筆管裏世事酒杯中

無患由疎散善終報固窮無疾而逝欲知相憶處淚滴舊

書叢余書集多中懋手鈔

愁雨

好雨成淫雨望陰更望晴微官已致邑薄地欲躬耕  
屋後短籬沒門前小艇橫老年渾少寐愁聽打窗聲

赴上海示善兒二首

來往清秋節稍寬行路難引年吾致邑世業汝從官  
風落仙霞嶺煙銷澹灘亦知繁劇苦相見且爲歡

又

教忠能學仕就養亦無方乍擬淵明賦又登單父堂  
父事非他取君恩安可忘先人有治譜先父曾爲大埔海陽令  
相勉在循良

哭蔣聞大

朔風動凜冽寒雨送淒涼聞信當殘歲哭君在異鄉  
名山著述富廉吏子孫長觀化雖無憾素交自盡傷  
余右下齲齒搖動者年餘矣偶因怒而浮飲食  
輒作梗以示醫者謂必脫不能留當去之余問  
痛否曰略施麻藥卽脫矣不痛也余因命治之  
初用銅鍼剔其外繼用麻藥入穴三度辛罄難

忍末用鐵鉗三拔之而齒不動余怒拔其鬚數  
根明日齒安然如故因賦二詩紀之兼以志悔  
能食卽吾依一朝忍別離礪無石可漱柔有舌相譏  
童稚常思亂換齒也黃鮐復見兒先母七十落一齒更生兒齒說詩  
應不廢尚可解人頤

又

吾尚存吾齒汝先去汝鬚金鍼挑四際毒藥糝中區  
連續三鉗進毀傷半點無飯蔬猶自可相保沒殘軀

侍婢削髮

有罪自當治如何令勿思情雖斷此日恩不異當時

芍藥應無色

芍藥壯丹婢

蠟梅空有枝

蠟梅花婢

現身爲說

法化出比丘尼

題六月黃菊

署中有菊六月黃華蓋異種也

粲粲開金靨疎疎擎翠脣且看清暑氣未說傲霜枝  
色愛黃英好香隨夏日遲秋風消息近元亮有前期

雲間訪舊

此去非無謂素交相往還目隨流水遠心與暮鐘閒  
殘照隱高樹秋聲發近山扁舟澹容與不覺到雲間  
秦望山莊呈却非先生

秦皇望海處摩詰竹莊成鶴髮青山老丹心白水明

得閒思昔倦話雨在秋晴

莊有倦還話雨諸勝

載酒問奇輩往

來少送迎

又

紆折通三徑回環其一池樹如華蓋古石比平泉奇

無日無花發有詩有酒隨徵書將入谷雲臥未應知

丁術士贈染鬚方

方名糊係上樹

知君是幻手乃欲幻余鬚白且成玄矣老能爲少乎  
跨騎微矍鑠媚愛暫歡娛無教猱升木終當返故吾

詠菊

秋光本澹素菊榮更鮮明紅白紛多品黃華獨著名

眼中驚絕豔意外有閒情采采及時好何須待落英

細菊

雲間多菊以細種者為佳

雲間一名五茸

園花分細種裊裊弄輕容豔色麗三粲繁英照五茸

豈惟曼倩偶

細君

應向楚宮逢

細腰

不謂秋光裏芳姿若

彼穠

### 送黃元律歸壽光

不識齊吳道君能幾度過共憐相見少祇惜別離多  
載酒春申浦橫波太史河寄聲黃叔度其柰廣文何  
乃兄駿公壽邑司訓頗失意

### 送猶子詩歸里

屈指還家近首春今已過雲間官舍遠江路故鄉多  
寒食培先壟書齋臨小河同歸空有說送汝意如何

### 詠署齋四鶴

野鶴雙雙至相親君子前連翩出海嶠嘹亮達雲天  
分粟未嫌累無魚意頗然往來書案側好與伴無絃

又

一琴一鶴可乘集喜堪知四皓羽儀在千齡壽算遲  
長鳴警夕露羣舞向朝曦散步蕭齋裏更添白髮隨  
子帥五言律對仗工巧如對雪懷丹崖云何處落  
偏厚誰人冷獨多送中懋云故鄉同我至新歲送

君歸夢獅兒云獅死遂三載猿啼非一時又如涼  
風一夜竹明月千里樓今夜一杯酒明朝千里人  
不可勝載附記於此 蔣聞大

七言律

傷春

征塵如雪點羅韉岸柳清明不禁煙三月殘春細雨  
後一鞭歸路落花前風光歷亂知誰惜鶯燕翩躚各  
自憐明月樓中人寂莫繡簾半卷淚潸然

歸途卽事

溪流山徑互欹斜處處晴嵐映淺沙萬里愁心連柳  
色一年春事到梨花望鄉自覺淚都盡歸路誰知情  
轉賒但有故園三畝宅肯輕離別向天涯

哭嘉倩姪



知君生死不櫻懷臨化猶然進一杯金粟書成何日

寄顏魯公卒後玉樓賦罷幾時回貪看天上奇花照

招搖之上寧識人間芳草哀垂白那堪更哭子楓林

江水早歸來

### 重九先醉公至見嘲解之

又將霜氣變秋光節物催人情易傷喜有朋徒來萬

里元定至怪無風雨不重陽濁醪任使空尊尊恥細菊

應憐短鬢蒼潦倒近時新量減惟君能恕酒人狂

### 送侯元定歸漳州

執手渡邊見落暉黯然別淚不能揮去時書劔知猶

在亂後人民恐已非郵舍槭楓先客醉渚田雁鶩到

秋肥憑將心事寄殘菊幾處籬頭相送歸

### 秋日同叔逸登樓

落日孤城黯素秋登高望遠共凭樓風煙慘慄千山

合雲樹蒼茫一點愁作賦有誰追屈宋論交喜復見

羊求騷人疇昔憂相接搖落于今意未休

### 留別秋濤

霜入征衫客子寒顏顏相向酒杯殘娟娟南菊閒花

發颯颯西風落葉乾小疊詩詞折簡寫長亭車馬倚

樓看與君同是別離意憐我多愁行路難

七夕纜舟城西橋

獨步城西望短亭  
離心冰雪共泠泠  
風塵岐路何時  
盡歲月逝波不暫停  
傍岸細泉沙尾白  
遠山積翠佛  
頭青鵲橋空自連河  
漢別有孤槎泛客星

別威寶

昨日送春今送君子  
規聲切不堪聞  
山花冉冉飄紅  
雨江水離離漾白雲  
鄉近還鄉心自急  
客邊留客意  
徒勤故園攜手難  
同去立馬斜陽別路分

過仙霞嶺

先父詩云閩地將分水  
紆回鳥道懸有山皆種竹無

壑不鳴泉征路遲  
羸馬春心怯暮鴉  
辭勞莫作客  
今且入西鉛此過崇安分水也  
仙霞嶺浦城分水  
皆屬建寧府

水流向背夕陽斜  
過此誰能不憶家  
舊日無諸已失

險無諸閩越王今朝有客且驅車  
三聲淚落悲猿狖  
一徑

雲封臥鹿麇  
征路不隨鄉嶺盡  
青湖秋色更浮槎  
仙霞

至青湖謂之小關崇安至鉛山謂之大關

遙弔小青墓在小孤山

欲取梨香棹小船小青喜梨汁  
孤山何處問荒阡  
空留一

片秋波影秋波影小  
不見雙開並帶蓮  
讀曲雨來燈

有暈畫松嵐起壁生煙茂陵司馬多情客  
茂陵司馬扶風丞也  
淚濕青衫染杜鵑

望金山寺

赴海江濤挾百川金山砥柱何森然人依北極天門  
迴家在南溟地勢連豈必妙高方有月自非中冷更  
無泉鐘聲吹落扁舟晚到此浮生願息禪

無題

合浦珠還未可期從前應悔錯相知三分眼語防鸚  
鵡一寸心灰聽子規劈破梅仁空結子折開蓮藕枉  
牽絲彩雲散去無蹤迹惆悵臨風欲訴誰

重九偶成

水落霜痕露淺沙秦川秋色老蒹葭故人寂莫誰攜  
酒薄宦蹉跎已及瓜九日閒居名可愛三山登覽路  
何賒南歸更落賓鴻後愁見東籬菊再華

過固關

井陘天險設巖城落日秋風動旆旌表裏山河強晉  
國接連幽薊翼神京長蛇陣勢漢時壘百雉人家客  
處兵我本函關舊尹喜休教錯認棄繻生

蘆溝橋

星橋環拱五雲中萬里堯封貢道同麗日開冰春水

綠明霞映浦晚潮紅  
狡狴據地何年起  
烏鵲臨津得路通  
近接御溝有海子  
朝宗江漢莫歸東

九日途中作

槭槭疎桐綠漸黃  
離離衰草露爲霜  
糟糠南國傷鴛夢  
兄弟西風冷雁行  
余有先妻亡弟之變  
憶別家園如昨日  
幾從輿馬過重陽  
最憐無語籬邊菊  
慣送征人客路長

汧陽道中

吟鞭遙指古汧城  
墟里孤煙傍晚生  
玉女峰前白雪映  
石魚洞口碧雲橫  
東風拂水春光淺  
落日催寒行色輕  
漸遠秦川勞悵望  
隴頭方作斷腸聲

秦中清明有懷

家山望斷白雲邊  
薄宦羈孤黯自憐  
先壟松楸空蔽日  
衙齋竹篠已參天  
棠梨雨後春將老  
杜宇聲中人未還  
冷酒盈尊愁不御  
石泉新火自年年

霜夜書懷

坐聽鐘鳴覺隕霜  
驚心節物近重陽  
長年鄉思隨秋盡  
此日羈情入夜涼  
露白葭蒼如宛在  
菊芳蘭秀不能忘  
江湖歸客今餘幾  
廓落淹留祇自傷

歸入函關

當關設險本天開  
百二秦封亦壯哉  
車籠暗藏范叔

入雞聲誤放孟嘗回池湟水盡黃河岸因河樓觀雲為池連華嶽隈何處青牛瞻紫氣今朝尹喜去還來

隴西遇敬止讀其詩而喜之因與約為兄弟賦贈

濯勞沽酒盡三升醉裏相看眼尚明同父推君堪作長元方媿我難為兄十年湖海秋心折一夜池塘春草生旅況蕭條不稱意空餘詩賦動邊城

晚景卽事

澹煙疎影晚蒼蒼簾幕東風日漸長郎署積薪人易老兵廚罷釀客難狂閒情一夜生春草遠望千山下

夕陽無限扁舟漁父意歸歟好去臥滄浪

送趙廣文歸漢中

登臨九日送將歸搖落離憂意自違老我周原閒歲月憐君棧道舊驂騑菊花酒熟人須醉苜蓿庭空草

自肥員缺奉裁淚灑渭濱不入漢渭不通漢心隨征雁共南飛

除夕

山城鐃鼓祝三豐冷署詩文送五窮汾水泛舟成舊

夢客歲轉餉宿汾陽岐陽騎馬更春風鬢毛改歲知添白燈

火照愁有底紅人世誰堪長忍此七年除夕各西東

賦別原蘇愚汪彥倫分齊字

遲日和風春事齊青門楊柳暮鴉栖詩中言別情相  
似病後分襟意欲迷天末歸人滄海畔隴頭流水夕  
陽西感君意氣不辭醉況是離尊難再攜

贈李乾行

短衣匹馬度關山回首峰頭雪未殘楊柳郵亭風習  
習梅花江館路漫漫燕都樂事猶堪憶余都中與秦  
乾行同寓秦  
地宦情久欲闌千里登門如夢寐銜杯燒燭不知寒

馬伏波墓

在扶風縣

裹尸還葬足生平近在城西七里亭疇昔飛鳶愁欲  
墜至今橫笛不堪聽春歸阡草萋萋綠夕照墟煙冉

墓前對南山後臨周道

冉青何必雲臺標姓字前岡後道志君銘

桐仙借別步何永昭韻

玉鳳女字桐仙名妓

萋萋芳草送郎歸淚落鮫綃舊舞衣白紵尊前閒皎  
月青門路口冷殘暉遙憐平叔春銷粉畏說明妃雪  
打圍么鳳桐花寧獨宿芳叢應向隴山飛永昭隴西人

隴西清明用前韻

依人萬里赴窮邊流落江湖近十年春去愁當杜宇  
夜書來家在鷓鴣天旅魂此際應堪斷歸計何時好  
作還微我客中無冷酒蹋春簪柳醉時眠

肅王故苑

以下蘭州四景

肅王廢苑冷蒼苔立馬登臨暮色來曲折流泉侵別館  
嵌空卷石落荒臺玉門惟有風煙接天水應無雁  
鷺回作賦今朝屬客子當時可賸老鄒枚

五泉飛瀑

五泉瀑布亂晴暉流出雲中濕翠微日映止疑虹遠  
飲月明猶似鶴羣飛嫋姚峰下懸軍井霍去病戰皋  
蘭山卽此  
寶誌巖前枕石磯誌公居我自洗心兼洗耳空山風  
雨發清機

榆谷

塞外榆牆接漢天黃雲處處起晴煙路通隴坂三千

里烽息回中二十年霹靂雕弓飛羽箭珊瑚寶馬拂  
金鞭沙場容易催人老買盡春光滿谷錢

河樓

憑高望遠思悠悠塞外風煙半似秋沙磧千年留漢  
壘鶯花三月憶皇州金城直北長城繞湟水迤西洮  
水流萬里河山圖畫裏籌邊何必賦登樓

懷子令弟

音書寥落已經年惆悵霜風晚照前白髮高堂無恙  
否青箱世業有誰傳一行從仕淹秦國不道因人過  
隴川自媿邁征負日月飛鳴徒誦鶴鴒篇

風雨

槐柳蕭疎官舍幽無端風雨似新秋懷人萬里心應折作客十年夢亦愁南國老親添鶴髮西州遊子敝羊裘浩歌一曲淚嗚咽聲亂枕邊隴水流

隴西送伍雪航歸里

隴頭流水咽離晨萬里秋風動去輪此地班荆逢伍舉他時投轄憶陳遵渡江蓮子初垂露過嶺梅花更作春憐我飄零歸未得幾番淚盡送歸人

步韻荅丹崖別

柳坡地名在伏羌縣寒色黯斜暉蘇李河梁淚滿衣白髮無

家愁作客青門有路倦將歸一尊明日難重醉雙鴿何時共遠飛回首憐君高處望遲遲未忍策征騑

秋胡妻里祠

桑葉杏花滿道周荒祠繫馬不勝愁徒勞羅網南山下韓憑妻枉自踟躕紫陌頭秦羅敷傾國甘隨流水去故

居空有白雲留良人地下重相見應掬長川洗舊羞

夢侯維屏河洛道中

童稚從師情已親中年況復結朱陳江南夜雨迷蕭寺余與維屏讀書開元寺河北春雲黯孟津五斗久疲薄宦客

三秋猶滯授經人楓林夢路不知遠枉駕前綏洛水



濱

道中上巳作

去年隴外似雞栖今日淮南逐馬蹄  
雨後棠梨山寂寂驛邊芳草路  
萋萋祓除幾女臨溱洧觴詠誰人集  
會稽獨客愁中逢令節杏花村酒亦堪攜

舟中書所見

嫣然一笑立船頭閒倚朱闌看白鷗  
眉黛翠橫如遠岫羅衣香散過鄰舟  
自矜洛浦凌波好未識湘江斑竹愁  
南下雙帆風正急留仙空擬上飛樓

還經釣臺

無限青山繞綠波倦遊心事獨如何  
鶯花越水三春節風雨橫江一棹過  
新句翻從重到少離情轉覺近鄉多  
平生亦有漁竿志漫撫羊裘作釣蓑

東湖觀渡

十里湖光鏡面低後山依約映前溪  
如艇綵鷁來還去似蝶紅裙東復西  
一棹晚風人澹蕩半江煙雨景淒迷  
興闌回首沙洲路幾陣荷香送馬蹄

九日

輕霜又入授衣天饒酒相看意惘然  
籬菊晚成開獨後江楓老去醉應先  
止知佳節逢重九不覺浮生過

一年余重陽前一日生極目秋光雁影外故園萬里隔風煙

閣成和蘇威寶

草閣新成亦偶然移南就北更幽偏三峰遙拱當窗  
外萬雉平臨落檻前散帙青燈閒聽雨馮虛黃鶴待  
乘煙願將蘇晉長齋地借與元龍半日眠

答林玄度

九日高秋爽氣鮮與君攜手晚風前微官萬里同淪  
落佳節重陽適後先可喜生身恰共日更憐交誼欲  
忘年玄度長余二十歲俱九月八日生登高相約扶殘醉一任黃花  
笑帽偏

對菊和韻

叢菊初開未落英偶來采采寄閒情傍釵新蕊思荆  
布泛酒故園憶弟兄人向三秋同此澹節逢重九愛  
其名看花近日偏多感莫怪杜陵淚眼傾

病

羈束一官意緒微近來多病轉相違誰家冬月喜霜  
雪何處春山無蕨薇骨肉滿前難助我平生萬事盡  
知非文園司馬遊梁倦正好移書自免歸

雪

朔風吹雪滿階墀一夜寒生布被知東海祠邊人跡

絕黃山館外凍雲垂亂巾懷妾留歌夕見鮑明遠集玉樹

思兒詠絮時薄宦天涯愁歲晚冰霜兩鬢欲成絲

先人忌日

音容長別幾春秋載主東西事遠遊荒署一杯供麥

飯故山何處種松楸從來斯日無他用禮日忌日不用不敢盡其

私也此去終身有隱憂君子有終身之喪忌日之謂也堪歎折薪不克

荷可勝清淚映黃流

觀海樓和楊樹滋韻

萬里長風獨倚樓羈懷曠覽乍消憂巨鼇終古戴三

島鴻鵠何時向十洲白日歸西東更出蒼波卷地天

同流幾回空憶乘桴去未得忘機伴海鷗

又

芙蓉別島湧寒青芙蓉島在之萊疑是蓮峰劈巨靈燦燦星

辰廻北極迢迢牛女隔南溟泉州牛女分野汪洋昔日旋河

伯清淺昨來愁蔡經環望中州煙九點此身曾是一

浮萍

又

白玉層臺敞八風蓬萊對峙海門東蓬萊閣在登州撫今景

物山河異懷古登臨慷慨同潮汐千年歎浩淼空青

一氣接鴻濛朝宗江漢歸何處虛受應知造化功

又

何日西歸感百川滔滔東赴似流年偶臨碣石來觀  
海欲泛星槎去問天不識瓠樽酌美酒何如蓬島學  
神仙麻姑聞說都頭白一勺爭教不作田

又

未能終老向林丘泛宅浮家笑薄遊身託牛蹄活斗  
水心隨羊角出神州短歌嗟爾雲霞晚長嘯浩然天  
地秋湖海元龍豪氣在思眠百尺故山樓

又

瀛洲宮闕未荒唐倒景平臨日月光西極遙遙探竈

海東枝灼灼采扶桑謫來人世聊遊戲歸去神山自  
渺茫鶴背吹笙安穩過底須一葦問舟航

後觀海詩和韻

積水周流徧九區東溟曾不滿偏隅樓船求藥人荒  
忽鞭石驅橋事有無霸國空傳雄主業海邦應屬素  
王都悠悠行潦盡歸壑一夜天寒桑樹枯

又

極目層波際暮雲危樓憑眺思紛紛黃河源委終當  
合先王祭川先河後海源委也岱岳高深可並分六月鯤鵬聊偃  
息千年龍馬自空羣依然水澹遠山峙魏武觀來復

與君

送劉靜屏之閩中

濯纓湖畔喜逢君，沽酒燒燈夜論文。勞吏京華愁轉  
輸，薄遊海國老風雲。座中陳孟猶能飲，洞口劉郎惜  
易分。芳草長亭三月暮，離情鄉思共紛紛。

重陽後小集和林雲伯

他鄉知己倍堪憐，來罄餘歡杯酒前。罌嶺霜清凝紫  
氣，海門秋老淨蒼煙。登高還許重陽後，墜地何妨一  
日先。余生日事蘭秀菊芳隨處有，與君強健待明年。

趵突泉和趙松雪韻

沅水潛行若有無，名泉開處見方壺。泉濬爲方池，上有純陽樓。海  
門地近趨應急，王屋源長流不枯。翠杓飄搖隨杖笠，  
虛舟浩蕩任江湖。家山石乳待吾久，泉州以石乳名。臨照徘徊吟影孤。

過葉淑和用原韻

柴門何事晚開關，獨客湖邊相往還。人世風塵容易  
老，春光流水幾曾閒。十千美酒不辭醉，五百狂吟未  
忍刪。簾外萋萋芳草徧，與君攜手憶家山。

歸過蘆溝橋

拾遺禁闥志難酬，回首空瞻五鳳樓。風色全欺緇撮

膠州一名  
黔陬

笠餘寒猶戀敝貂裘途窮阮籍誰青眼年少賈生早  
白頭水落桑乾沙似雪又隨曉月過蘆溝蘆溝曉月  
八景之一  
膠西中秋送駿公壻歸里應試兼懷舍弟  
三旬休暇客黔陬試事送君故國遊前路計程人萬  
里當杯話別月中秋霜華寒映芙蓉劍山色晴侵舩  
艫舟歸到鄰莊見小弟相思引領共登樓

聞蟬感懷

殘蟬淒切送寒聲搖動羈孤薄宦情到處齊秦俱寂  
莫何時耕釣遂平生庭槐花落秋風起烏樹烟銷暮  
渚平十畝田荒三徑遠賦歸不易作淵明

寄証山

與子相望百里間秋來處處雁飛還袖中不見瑤華  
草夢裏猶疑落月顏舉案人歸繡被冷持螯客去酒  
杯閒西風失路英雄淚應落素書幾點斑

哭弟

堪悲海岱望衡荆總為饑驅萬里行藁葬他鄉嗟爾  
命羈孤半職媿吾生瘴烟瀘水愁難渡卑濕長沙病  
易成舍弟赴長沙幕卒  
于瀘溪暫厝焉恐動老親傷少子淚霑枕席  
更吞聲

憶丹崖

多時不見故人書，荏苒星霜又歲除。知己比鄰風雅在，弟兄一室晤言疎。隴山越水蹤難定，海日岱雲意不舒。懷袖三年舊短札，挑燈讀罷更愁余。

送黃小龍護林雲伯喪歸閩

知君此去爲交情，執紼春風萬里行。有弟未歸嗟斷雁，無家數徙學遷鶯。送喪投傳申屠子，白馬素車范巨卿。我有鵲鴿原隰痛，遙將雙淚寄柴荆。

秦望山莊步趙雙白韻呈却非先生

問字尋師到墨莊，四圍雲樹醉秋光。何妨偃仰臥泉石，自有勳名在廟廊。望裏池臺隨意出，閒中日月與

人長。籃輿未了遊山興，更擬招邀上野航。

又

金谷花開不辨香，桃源迷路向何方。偶來輞口尋山館，一似東臯入醉鄉。映水華燈千點白，迎陽細菊半邊黃。授經本是安昌客，自媿名山今許藏。先生見史緯大加歎賞

丹鳳樓觀潮

淞水橫空氣湧流，閒來高處看潮頭。江通吳楚帆檣集，澤散溝塍禾黍收。樓觀飛翔丹鳳翥，波濤蟻蛭玉龍浮。憑虛一放登臨眼，入望風煙萬里秋。

壺齋詩刪卷五

五言絕二

擬古

菊花何太遲梅花何太早只願顏色存終有一時好

又

飛燕不嫌瘦玉環不厭肥好老與好少顏駟空爾爲

又

冠玉豈不美奇計豈不長無知不相薦長貧戶牖鄉

寄駿公

蘭芷騷中珮梅花夢裏雲聞聲未得見何似久離羣





過張嵩颺別業

半畝讀書處槐陰覆古苔念將遠別去坐久當重來  
少婦道及秦閩離別之苦泣然泣下令余賦詩  
口占絕句

別淚如黃河隨君到滄海見時憶別時眼角留痕在  
偶成

偶因啼鳥處憶得落花時春色隨流水勞人自不知  
哭弟

月落清猿哭春歸獨鳥啼故山可掩骨何事葬瀘溪  
重陽

蕭蕭風落葉秋色老重陽何處登高好雲山非故鄉

送何嶼伯

同病自相惜君歸似我歸傷心各有淚不向別時揮

田家雜興

寓東萊作

春來苦雨少秋至愁雨多閒立衡門下流水欲成河

又

分收得穀少承租得穀遲西成莫盈取留力向東菑

地戶原承租水旱不時與之分收僅獲其半

又

無田先買穀有田先納糧防飢與輸稅莫說是他鄉

答贈美人石章

共識春風面獨憐不轉心姓名欣有托欲報愧南金  
病起過修人

蠟梅

老榦欲欺雪幽香可並梅春風消息到一夜蠟丸開  
別意

天明月色淡斜照綠楊影行人立在門宿醒半未醒

寒亭

寒泥  
故地

風緊雪花零殘燈一點青薄衾聊自擁今夜是寒亭

新河不寐

松月色蒼蒼乍疑日出光到家一舍近今夜不勝長  
懷修人

一別春風遠相期秋月明懷人無限意寫入離琴聲  
夢公至

雜興

世上無知己此心向誰論夢中共痛哭醒來聲自吞  
脩然短睡覺已見夕陽西春水綠猶淺暮山青不齊  
冒雨栽花

此栽花蓋將開而移  
之故有及春云云

開遲不及春開早春光老恰是賞花時雨中栽亦好

好花

一樹好花開鮮明照酒杯會心原自遠何必折枝來  
送春大風

一夜東風急落英遍短籬明知留不住故作盡情吹

留客夜飲

天風吹海水雨雪暗萊山疎酌夜方靜留懽更上關  
素馨花

細蔓垂朝露繁花帶夕陽嫣然秋色裏采采惜年芳  
將發都門得家信

歸途良自慰千里寄平安不用近鄉怯應忘行路難

早發聞磬

寂歷新庄路霜濃夜向朝草菴清磬發送我過河橋  
白菊

月出娟娟影風來淡淡香白衣不送酒秋色過重陽  
將發都門有題

雪埋白塔寺潮打石頭城燕市望江浦蕭條千里行  
絕句別諸同社

社酒殊堪醉可憐作別筵話長更漏短去住共淒然  
絕句

馬足揚州路愁看春草青暗憶曾行處何嘗不數經

積雨聞蝦蟇

水旱苦無時肉糜不救飢公私今兩困聒聒爾何爲  
寄意白

經旬州府中公事各西東別後更相憶論詩恨不同

南昌守歲

風雪送窮年江湖隔遠天丹心杯酒後白髮短檠前

茅齋

茅齋依古樹六月作秋聲漸識西風至天涯無限情

竹夫人

弱質自湘中幸君枕簟同班姬共薄命容易感秋風

秋水

露冷葭蒲色霜淒鴻雁聲平蕪綠盡處秋水隔林明

莫愁樂

佳人何姓字佳人字莫愁女蘿施松柏千尺並到頭

聞木犀

賢士居人國朝野有輝光一樹桂花發山塘十里香

客中初度

勞生獨自傷隨地過重陽秋光總不異花似故園黃

遠望感懷

萊山高處望雲起識清源山即泉從仕何如隱問心自

不言

答駿公別

春雨送孤舟秋風吹匹馬堪憐掖水流長繞萊山下

淮陰道中

春草迎人綠暮山隔水青行行不覺遠又是一長亭

望廬山

船頭看山色日落見深碧中有雲栖人遙遙不相識

滕王閣

江山信美矣詞賦足當之傑閣開章水天留與二奇

探春花

一片繁花白幾陣暗香深春光來何處應向雪中尋

絕句

長日倦驢背昏昏只欲眠何如估客樂高枕白浪船

梅

今人愛其華古人重其實詩之標梅書之鹽梅禮之梅諸皆實也誰知

冰雪姿自有鼎鼐質鮑明遠徒有霜姿無霜質

鳩

桑甚無多食鵲巢聊可居數聲春雨後咫尺似園廬

蠶

秦人效我食楚女羨余眉獨有晉陽尹不能為繭絲

又

桑出羅敷採絲登織女機吳綾天下滿卜子曳鶉衣  
茉莉花

茉莉只一朵清香滿竹牀半酣酒易醒孤枕夢難長

顛江舟回

江水一千里斷雲間密樹歸客莫銷魂總是來時路

紀夢

一病緣消渴相思別路長多情來入夢分我荔支漿

漫興

好書讀將盡美酒賒不來掩卷焚香坐苦茗進一杯

憶補兒

憐少父母情衰年見晚生耕田願已足未敢望成名

鍾情

竹雞晴叫雨杜宇夏啼春小物情難化何堪我輩人

晉興八景一日市心塔影在仁裕倉前余旅次

無聊時時見之漫成絕句

孤塔有何意朝昏立我前故人一別後日影幾回圓

送子令櫬歸葬

骨骸歸故里妻子委他鄉不盡東流恨死生俱斷腸

照古鏡

古鏡明如月短髯皓似雪持來相比照不覺肝腸熱  
燕京口號

摩肩更疊跡一个不相識往來休借問總是利名客  
絕句

在家亦無樂出門有何悲扁舟且看雪驢背好尋詩  
大雪

滿路皆瑤草平疇盡玉田青峰相對老頭白不知年  
武岡遇雪

不見武岡月龍標詩武岡前路看明月只見武岡雪五溪前路遙  
愁人傷離別

寄書

下筆真如訴封函暫似還叮嚀送書鴈好去度關山  
紀夢夢入覲賜對

魂夢繞丹楓孤臣萬里蹤不知傳野客何日感高宗  
庚申臘月朔夜辰沅道中夢先嫡授以佳果口  
號

一見牽衣後雙柑出袖初雨雪關山路應知不忍余  
鄭濟贊曰魂夢通神惟君與親日忠日孝吾見斯人

折梅

相看意不盡折得一枝來疎映寒燈下餘香入酒杯

除夕途中作

雨雪暗泪潭除夕駕征驂不知今夜夢何路到江南  
梨花

溪橋野棠開香飄芳草路可惜近清明人間傷心樹

白龍堆

亂石森奇鬼驚濤挾震雷雙瞳未及瞬已過白龍堆

道中聞鶉

啼血聲何苦應怨別離人亦知歸去好只愁不及春

宿東林寺

不見瀑布水惟見白雲峰今夜東林宿展眉聽暮鐘

九江望廬山

白雲在山陰江流殷其會彼此皆廬山何必分向背

南康望廬山

今見廬山面昔見廬山背我識真廬山來往廬山外

大道

大道平如掌冬日暖似春朱符發白馬流水送征人

望塔

秋光懸夕照野色上朝煙望中城邑近旅客意依然

過淮河

絳葉槭楓少枯枝榆柳多回頭一悵望早已過淮河



相逢行

余苦寒自閉車戶南去女郎望而笑之作此解嘲  
卿去啓朱戶我來閉綠窗大堤雖共路南北不同風  
早朝

萬里孤臣遠江湖老歲年幸因奉使便不寐待瞻天  
辭朝

又辭魏闕去忠愛豈無心薦牘今時少君門自昔深  
好夢

忍凍臥燕市抱寒宿潞河土牀今夜煖好夢未應多  
鵲

聞聲人盡喜利口自囂囂爲何傳說誤秋至頂毛焦

語云帝命鵲報牛女七夕日一相見  
誤爲七夕天孫恨之拔其頂毛

遣使

江路紆如織驛騎遄若飛一封遣回使先寄客愁歸

贈阮疇生

疇生爲哲  
信喪入都

攜將一掬淚萬里入長安祇爲交情重不歌行路難

又與疇生  
論詩

論詩各有見彼此可參觀騷雅終無絕秋菊與春蘭

寓漕倉讀書

米廩有虞學禮記米廩有  
虞氏之學也石倉曹氏園竹籬雞犬趣

何必異東屯

疎雨滴梧桐唐人佳語又有秋色老梧桐之句  
詩以合之

平時雨點疎此日秋光老不道葉將稀猶云聲自好  
漫成

老子既無武時人不好文飲醇與近婦聊學信陵君  
房中水仙

素質映檀心春風簾幙深凌波來洛浦閒夢共幽尋  
別丁慎園

平山看月色乍浦聽潮聲有會終須別堪嗟失意行

贈陶去小梅花一株

老榦相依舊幽香移植新何須籬下菊方贈姓陶人  
又

移來病已愈時去小  
有疾閒步踏蒼苔新萼初破處巡簷  
到花開

五顯嶺

孤松千古翠萬竹四時青曠覽窮閩越吁嗟此地靈  
哭亡孫女好英

齒折猶沾血兒殤更戀親牽衣最可念長別在茲辰  
廿三日午酌午後  
立夏

今日雖云夏此時尚是春好來花下酌猶及送歸人  
常吟咏

一日是一日過此未之知七十古來少樂天正此時  
途中遇雪

村塢居人靜關山行路難憑君休怨役高臥媿袁安

六言

附

憶荔支

有酒不妨待詔無蟹何必監州故園荔支漿熟丞哉  
空負清秋

七言絕

循州道中

人煙星散路迢遙愁見荒原野火燒漠漠飛花山半  
寺青青垂柳水西橋

舟行卽事

餘漲初消宿雨痕輕舟解纜出山根鷓鴣聲裏征帆  
遠回首雲多失暮村

余先過仙霞有詩示丁王二友茲當買舟青湖  
再題絕句

北來賓雁影悠悠望斷湖西芳草洲鳥道閩關二百

路猿聲越水一孤舟

謁選經釣臺四首

爲貧休說路艱難  
炎暑孤舟上淺灘  
披拂高風千古在  
晚來煙雨一江寒

又

三伏重衫亦自傷  
無難多病早披羊  
只憐意態不如故  
涉世年來已失狂

又

梅福豫章堪作尉  
東方金馬亦沉浮  
客星從不屬分野  
應見今宵照小舟

又

吾知樂事同濠濮  
垂釣意原不在魚  
休向臺邊空咄咄  
雲山頃刻過桐廬

吳山過雨漫成

第一峰頭立馬時  
湖光山色兩相宜  
不須風雨更畱客  
乘興歸來本自遲

揚州

隋宮遺事已闌珊  
二十四橋月色寒  
漫取洞簫尋舊曲  
飛來孤鶴下雲端

七夕揚州作

撲面西風淚不收竹西歌吹自風流猶云牛女同分野相去人今十二州

泉揚皆牛女分野中歷十有二郡

### 憶荔支

暗風微動紫囊香曉露初凝白玉漿今日有誰貽繡履當年恨不典羅裳

紅繡鞋荔支名閩謠荔支有過時羅裙有贖時

### 白苧詞

茉莉花香白苧鮮如鈎新月共嬋娟清歌妙舞畱人醉過盡春風不借年

### 楊柳詞

綠柳垂絲映碧池可憐明鏡鑿修眉別來多恐凋零

盡只有當年張緒知

又

楊柳青青傍楚城飛花飛絮近清明淡黃嫩綠今何處啼斷棲鴉日暮聲

### 石魚歌

石魚娘子者汧陽張氏養女也主人畜魚千餘首屬女視之忽夜雨池溢魚乘水而逝女徒跣追魚數十里至草壁峪見魚在亂石中亟前往魚皆入石罅不出女泣曰主人以魚屬我今無魚何以見主人因矢之曰爾卽生石頭中必欲令爾出也遂

石死有耕人哀而葬之夢女謝且告之曰吾已  
令石魚出人間矣試取墓前石剖之片片皆魚也  
邑人立廟以祀稱石魚娘子云按石形似瓦淺碧  
色剖之一魚兩分鱗鬣俱備脊骨有低昂處合之  
依然一石魚止鯪鯽二種蓋當日池中物也間有  
魚子藻苔之形或傳石中有女娘廟宇飛魚夾輿  
以行未之見也石魚可辟衣蠹投火中臭味與凡  
魚同  
汧陽草壁似懸罾漁子安知河伯宮秦水無魚君莫  
異秦魚今出石頭中

又

採將片石比瓊瑤打鼓提壺薦野蔬別向山中名石  
首方知緣木可求魚

溫泉宮

洗脂漲膩華清池荳蔻香連菡萏香連菡萏  
後荔支露冷齒酸時

豫讓橋

感慨悲歌汾水濱多慚國士老風塵如今橋下有誰  
伏橋上驅車是眾人

銅雀臺

銅雀春深花滿枝含愁斂恨向空帷君王不嫁宮中  
妾心事他人那得知

又

繡履初成欲賣時含情親自卷簾帷令人懶望西陵  
塚七十纍纍知向誰

又

蠹蠹三臺臨二漳清漳濁漳月明環珮響迴廊而今剩有

鴛鴦瓦畱與行人寫短長

馬嵬

自讖生平繡佛前慧心女子定生天可憐未盡鉛華

想畱作人間脂粉緣

楊妃墓出粉能去癩

除夕

天涯望遠更悲歌老去人生奈若何堪歎一年今夕  
過燒燈相守總無多

曉發

皇皇顛倒着衣裳客子關心去路長誤看月光當曉  
色馬蹄踏盡五更霜

路傍楊柳野火燒殘感之作詩

幾株垂柳傍溪橋一夜寒原野火燒應識人間離別  
苦春光不忍到長條

又

最是垂楊管別情殘枝憔悴倚長亭修眉明眼終難  
化一見東風依舊青

和永昭飛花曲

伴狂孤客老天涯南國佳人感物華一夜啼鵲芳草  
歇斷腸曲曲唱飛花

望丹崖不至

西風蕭瑟動寒幃嘹唳聲隴鴈飛望斷碧雲君不  
至一庭霜滿菊花稀

隴外霜能殺菊

過丹崖舊寓題詩

丹崖寓隴西火神祠近營新居於朱園曰借柳

朱園山前板屋新火星祠畔少詩人我來猶作浣溪  
想青竹題歸獨愴神

丹崖詩

人歸南海今東海我續新詩感舊詩別去四年萬  
里外隴頭孤館一相思

雨過羅灘

羅隱舊居

水急灘高溪路斜松關竹屋白雲遮不知煙雨空山  
裏何處當年隱士家

夜泊

月湧江心風浪生逢逢鼉響應長鯨舟人不用多驚



恐只似山中鐘鼓聲

寄孥秦中三年遣兒善攜取計除夕可到悵然  
有懷

冷署寒燈伴不眠東西相望亦堪憐縱教元日人來  
到也是虛過此一年

又

他鄉兒女玉成行掌上明珠赴渭陽只望牽衣慰老  
眼誰知別後轉淒涼

病腰

支離轉側倚匡牀知爲情癡爲酒狂夜半忽來演夢

草愁牽病緒柳絲長

除夕懷秦中寄眷

掖河長是繞萊山飛鳥孤雲日暮還夢路相尋輕萬  
里雞鳴獨自出函關

巡夜口占

得得馬蹄踏雪城短衣長劍舊諸生真堪一笑爲貧  
仕刁斗風前似老兵

偶見

香鞦細馬驪輕身笑靨臨岐更作顰日暮自然歸有  
處不須愁却路傍人

題雲師贈扇後

團扇逢秋涼吹生別來恩愛不勝情今朝懷袖重相見拂面春風滿鳳城

寄書舍弟

一封未寄屢徘徊何事人歸意轉哀長是訴難與告苦此中書去似書來

聞鄉音

乍聽猶疑恐未真蹙然空谷自相親年來離亂知尤甚到處常聞鄉語人

偶書

河北女兒色似花乘涼編帽坐簷牙郎君騎馬來持看袖裏有錢只說賒

見芍藥

牡丹開過未須悲芍藥看來亦不遲飛燕玉環皆國色唐宮漢殿各當時

郵舍古槐

荒亭古樹倚婆娑爲愛薰風拂面多半畝槐堂歸未得暫憑清夢到南柯

黃金臺

薄遊仍過黃金臺立馬薊門暮色來惟有燕昭重國

士平蕪千載使人哀

卽事

空庭積雪噪饑鴉  
狂客蕭條正憶家  
睡起情懷無遣處  
自銷瓶水試新茶

亡妻忌日

無多舉案與眉齊  
剪紙招魂東復西  
最是老姑澆麥飯  
十年猶作死時啼

聽雨憶弟

蒼茫飛雨過前山  
乍聽猶疑似夢間  
忽憶連牀聲咽處  
茅簷竹枕共潺湲

哭外父蔡公

多難崎嶇未死身  
當年擇壻不知人  
九原應見辨琴女  
爲說梁鴻如舊貧

巡海口占

一望泱泱大海濱  
自公脚禁謝波臣  
聖朝不貴魚鹽利  
杼柚東方莫怨貧

又

三島依稀海外山

東萊有三山島像蓬萊方丈瀛洲

巨川欲濟路漫

漫鯉魚風起羅衣薄  
吹得春寒上馬鞍

病酒張虞際見招不許辭

春衣未換木棉裘  
新燕歸來說舊愁  
同社故人相勸  
酒昏昏醉眼更扶頭

送春

昨宵風雨送春歸  
杜宇聲聲怨暮暉  
我欲送君迷處  
所落花別淚共沾衣

題渭橋

余從事扶風十年不調  
汲薪徒積潘髻就衰宦情  
老况槩可知也因轉餉都門  
重經渭橋索筆漫題  
亦以自嘲

冷風撲面酒全消  
策馬孤征路轉遙  
猶喜不題柱上

字今朝重過渭陽橋

讀曲詞

情生情死恨難消  
掩卷青燈不自聊  
漫道昔人魂却  
返此時人故自魂銷

又

孤客誰貽芍藥朶  
愁人難看牡丹亭  
偶於夜月浮中  
白何處西風哭小青

偶述

白髮數莖身未老  
殘書一卷日將斜  
山光海氣連秋  
色都入閒庭叢菊花

悼殤女二首

一旬已過一生身  
薤上露珠草上塵  
何必彭殤分異  
視百年人世總逡巡

又

汝兄掖墮地卽云亡  
將汝視兄壽已長  
多少夜臺骨肉  
在扶攜嬉戲莫悲傷

護菊

插竹編籬習小勞  
待將九日泛香醪  
不知素月流新  
照疑是前山秋色高

中秋壽少婦

萬里長天淨片雲  
佳辰秋色恰平分  
嫦娥早不偷靈

藥華髮蒼顏老似君

余年五十

有感而作

兩代詩存三百首  
今人動是數千餘  
仲尼縱在無刪  
處直待秦皇焚却書

行路難

聽我長歌行路難  
春歸朔雪尚漫漫  
禦寒沽得一杯  
酒酒醒誰知風更寒

酬劉黃中借梅花

菁蔥玉樹接芳鄰  
歲歲劉郎園圃春  
置我羅浮一月

夢看花何必種花人

水仙花

宛似伊人在水湄  
凌波仙子雪冰姿  
幽香不與羣芳並  
惟有梅花可共時

洗象絕句

響水閘邊激浪飛  
都門士女看成圍  
奚奴莫惜殷勤洗  
南服近來進貢稀

燕中重陽

韋曲近鄰尺五天  
今年人在帝城邊  
何須更覓登高處  
坐對黃花無酒錢

李鄴侯

白衣垂老出山中  
補袞論思十載功  
獨有知人事不易  
竇參何似陸宣公

小除夕瀛州聞樂

啼鳥殘臘曉寒天  
久客思歸渾不眠  
何處喧喧簫鼓發  
人家娶婦過新年

早發

滿天霜落暗風吹  
白盡鬚眉不自知  
獨有家山高臥好  
淵明猶恨賦歸遲

雨泊燕子磯

長江煙雨渺茫茫燕子磯頭繫片航舊事南朝隨逝  
水莫教芳草怨斜陽

木芙蓉

最憐池上木芙蓉幾度深紅間淺紅暮色四圍秋氣  
合暫憑一醉拒霜風

揚州

雨餘芳草送新青幾度春風發廣陵馬首天涯南北  
路竹西歌吹不堪聽

別路口占寄存至

長亭杯酒送殷勤無奈新愁破宿醺已恨青山迷望

眼那堪南浦起行雲

乞巧詞

終年苦織不成章咫尺銀河萬里長會少別多無限  
恨有何奇巧乞諸娘

鄭州見佳人

鄭州何必減巫山昭君巫山人素面春風画裏看爲

問明妃出塞後琵琶舊曲向誰彈明妃暗指佳人

聞鞦韆笑聲

羅衣動處麝蘭香花影低陰月轉廊笑語慙慙渾未  
睡多情宋玉在東牆

雪後郊行

雪後山巔復水涯  
蕭疎林屋映村斜  
騎驢未覺詩情減  
只少寒梅幾樹花

西湖南岸同北岸佳人渡橋

流水桃花落細潮  
垂楊影裏路迢迢  
彩虹兩岸夾明鏡  
照見紅妝共渡橋

舊滄州鐵獅

在柴世宗舊居

古佛堪銷丈六身  
獅兒何費鐵千鈞  
當年鑄此應非

錯率舞清時見

聖人駕幸滄州觀焉

懷李于鱗

歷城不見李于鱗  
宇內風騷日少人  
獨坐小樓看白

雪有誰堪與和陽春

于鱗有白雪樓

又

李何王李一時雄  
迭起爭衡有楚風  
輸與高楊稱領袖  
從來持論屬虛公

悼趙石寅

詩名十載擅東萊  
風雅寂寥自可哀  
猶有草堂遺照

在月明還過建溪來

石寅與建安張式如共寫一小影

桃花夫人廟

卽息夫人

湘娥珠淚濕斑竹  
息媯玉貌比桃花  
不語成蹊春寂



寂荒原野廟屬誰家

幔亭

朱子云武夷君不知何神漢人祀以乾魚

幔亭千品宴曾孫仙樂侑觴響過雲一片乾魚亦自好漢書堪證武夷君

送春

一年春去太匆匆強半酸風苦雨中嬌鳥枝頭啼不住聲聲與客訴殘紅

灌園

應憐抱甕灌園田野水交流似小川閒向柳陰箕踞坐會心是處有林泉

桃樹爲大風所折

桃根蟲齧已多時不禁狂風一夕吹堪憐僵在露井上李樹何曾肯代之

又

灼灼紅香爛曉霞衝颺怒雨共交加可憐南陌遊春女不見東風二月花

湖西棹歌

青螺山上片雲飛白鷺洲邊雨濕衣湖水西來三百里南風好送客船歸

過惶恐灘

七齡隨父過南安投石水嬉打彈丸四十六年如一  
夢重來惶恐上高灘

又

信國當年悲失路大家讀史識灘名我今惶恐向誰  
說日暮天涯孤客情

立春感懷

我於世間眇眇身世間於我悠悠人五十之年忽已  
過天涯芳草又逢春  
兩度看親不就

燕脂紅粉鬪時妝俗艷未堪匹老狂風雨去來三百

里鳳飛辛苦爲求凰

登晉興署樓

署裏有樓如不知半年勞吏敢言疲今朝雪後一盃  
酒坐對江山檢舊詩

寓崇聖菴

清泉修竹舊叢林不改二時鐘梵音幾卷楞伽消白  
日偶於靜處識禪心

端陽

年年依舊此時光男女村村各自忙簪艾鬪船人散  
後江頭獨立對斜陽

又

臨江昭武與番陽佳節三年在異鄉未審明年當午  
日此身漂泊更何方

題鶴鶉補

八品章服

易安世上是鶴鶉自昔鶉居比聖人  
莊子聖人鶉居穀食百結  
垂懸衣卜子十年舊繡被吾身

憶補兒

牽袖挽鬚不顧忙清明別後又端陽閒來憶抱襟懷  
裏教誦新詩一兩章

聞蟬

庭前一樹柳陰疎嘒嘒鳴蟬五月初搖曳夕陽聲轉  
切風簷伴我讀殘書

送長男善歸里葬親

自恨東西南北人微官羈絆不由身種松荷鋤屬吾

子相送渡頭淚滿巾

先慈卒於掖署耿變暫厝嘉興呈乞歸葬不許令善代余襄事

春分

春分江北始知春暖氣中人似酒醺腸斷江南千里  
隔尋花穿柳不相聞

余全人客遊不遂詩以解之

南浦西山一望中君來恰是遇秋風莫嫌短水

酒名不

堪醉勝看江頭楓葉紅

又

閩海江瑤江瑤柱海錯佳品白吐珠秋風張翰憶蓴鱸楓亭

更有荔支好休向劉君索畫圖

照冰鏡

野水堅冰照見人鬚眉皓白骨嶙峋疆場萬里猶堪  
往三尺龍泉七尺身

曉日

迢遞雲山過五谿層冰積雪路淒迷朝來日出前峰  
見西楚西邊更向西

聞雞鳴

數家茅屋若晨星獨宿空山旅夢驚杯酒醒來渾不  
寐荒村喜有曉雞鳴

聞犬吠

滇黔亂後更艱難避地人家不憶還何處一聲破寂  
寞野塘寒犬吠空山每鋪設兵數名謂之安塘

過戰場

圖霸爭王事不成桓溫空臭萬年名江山百戰依然  
在盈野殺人不復生

又

千里饋糧苦鬪爭到頭贏得一空城十年生聚誠難  
事戰勝廟堂休用兵

憶瑞香

于役川黔征戰場容顏黧黑鬢如霜賦歸幸及早春  
好緩步齋頭看瑞香

梅花

二月梅花開未殘幽香幾陣送征鞍自憐空谷無知  
已畱與詩人歸路看

貴陽道中馬骨如山有感

雲錦顛隄亦可憐平鋪高岸與深田埋沙駿骨應難

化一路春風開馬蓮馬蓮馬所化

望城驛在偏橋

春風行李路迢迢半縷征魂黯欲銷煙火夕陽憑軾  
望青青一粟是偏橋

島戶唐詩島戶巢為館是也

絕壁臨江開洞門相攀一似掛枝猿平疇沃壤非無  
意苛政只愁及子孫

又

梯石懸繩棧道通桑麻雞犬在其中雕梁畫棟連雲  
起誰識檜巢太古風

卽景

春水平疇綠滿畦空林雨歇鷓鴣啼輕篷短棹沿山  
轉何處人間罨畫溪

清明

綠水青山無盡期異鄉客子最堪悲東風寒食天涯  
路不禁銷魂是此時

戲作六程詩

太湖縣小池驛宿松縣楓香驛黃梅縣亭前驛  
太湖石畔小池塘絳樹楓林冉冉香行過亭前松下  
宿依稀梅子弄青黃

贈疇生出家

屈指行看六十年不將因果問前緣雄心幾許難銷  
處一向空門盡釋然

朱龍橋

朱龍臥水作長橋三百餘年王氣銷今日橋存龍已  
去鐵驄河上自逍遙

荻港遇風小船幾覆風定示同舟

從茲遲速一任天飽食安眠意坦然泊雨灣風公莫  
怨昨宵片刻似經年

大姑塘

昨夜彭郎娶小姑大姑獨處晚塘孤弟先兄舉從來  
有不獨馬家第二姝

歸來

歸來行止頗由我一半驅車半放船莫道采蕭歲已  
暮到家猶及過新年

入門

遠遠聞聲早下機到時猶問別時衣入門相見真堪  
喜何必封侯拜相歸

贈園中綠萼梅

粉紅萼綠太芳華殊異冰霜茅竹家不共碧桃天上

種勁枝老榦自橫斜

垂絲海棠盛開寄趙仲昭絕句

麗色兼香本自難垂絲粲粲故堪觀相思聊折一枝  
寄臭味同心卽若蘭

漫感

每逢夏日畏炎曦一見秋風客便悲只是芳春天氣  
好却云有女苦多悲

東湖蘇雲卿祠時帥改作燕遊之所名澄心亭

感賦絕句

種蔬織屨住湖陰猶恨入山苦不深本自踰垣避漕

帥任君祠宇改澄心

秣陵道中有王奇然者見余泣言本山東濰縣人以事繫掖邑獄余辨其枉至今全家為余念佛余去東萊十餘年不復記憶因感其意聊紀

以詩

攝州署邑政無奇遺愛敢云常見思十載春風白下路有人垂淚說當時

法輪菴看花

幾樹芙蓉照碧波坐來不覺感秋多拒霜三醉未相讓我亦顏顏得酒醅芙蓉

又

絳幘崔巍指日紅亭亭不怕五更風年來殊少飛鳴意應伴孤僧鹿苑中雞冠

又

粲粲紅英間綠絲故牽秋色上高枝僧寮本乏曉妝鏡幾度因風映碧池兔絲

自題小像

証山居士為說偈曰此心能不用安排三教二姬一齊來

儒衣僧帽道人鞋用顧仲瑛事三教先生是我儕雖有二

姬侍左右此心總不用安排用胡安定事

繡毬花



誰把圓毬月下拋當年誤掛在枝梢剪開用盡春風力剩結同心朵朵交

碧桃花

不識綠衣與白衣天天灼灼是還非佳人日暮碧雲合獨向瑤池月下歸

宋樹

朱文公武夷書院手植茶十八株今只存其半名

曰宋樹山僧采以見寄云

五曲當年手植茶

書院在五曲

寄來猶自帶煙霞山泉曉

汲不知遠芒屨葛巾濕露華

聞布穀

居人四散盡逃兵一望原田野草生山雨初晴春水滿愁聞小鳥苦催耕

芙蓉

微醉酡顏拒曉霜旋施朱粉向朝光更憐酣笑秋風裏常伴詩人立夕陽

哭李乾行二首

十萬一揮不皺眉共知亞次是奇兒江邊便可埋君處只恨無人荷鍤隨

獨遊黃州卒於舟中

又

字學右軍詩少陵雲煙散盡若爲情平生一點知交  
淚不待山陽聞笛聲

書中丞公題沈石田黃不黃米不米小畫長歌  
後

一角遠山不爲少郭忠恕四壁水石不爲多孫知微非黃  
非米并非沈總屬右丞長句歌

偶題

物物生成各有涯滯寒桃李未開花開遲反得看花  
久不用後時空歎嗟

午睡魏昭士見過出迓已去賦謝

坦腹陳搏方一睡意行魏野偶然來白雲出岫還歸  
去空喚應門掃碧苔

少婦三十初度大雪

姜女年來三十春齋頭長伴讀書人前生本是藐姑  
子彷彿瑤臺白雪新

平湖得孫志喜

清白相遺不我欺當湖署裏見孫枝天香亭畔有嘉  
樹封植多應爲憲之

雪

曉起迴風勢更加閒庭竹柏互欹斜祇因今歲梅開

晚貽我林園處處花

歸過釣臺

殘書小艇載歸來讀罷回頭失釣臺  
買得江魚堪佐酒子陵所釣豈殊哉

過仙霞嶺

林幽處處泉聲響地迴時時雲氣生  
忽覩山從深谷起方知人在嶺頭行

過劍州

化龍化劍亦尋常來往延津山水長  
旣不周防充我佩蟠縈何用有文章

歸過常思嶺

常日思歸今已歸登山緩步意遲遲  
仕途歷盡崎嶇路下嶺未忘上嶺時

重過常思嶺

真似未忘上嶺時重來慚見舊題詩  
百年人事難休歇空有歸期常見思

過釣臺至桐廬

嚴陵此地昔嘗漁相接桐君舊草廬  
卽今巖穴爲孔道勞生何處得安居

剪春羅

澹澹輕黃試薄羅花前痛飲更高歌春風快似并州  
剪剪綵隋宮且讓他

余署齋紅梅有三奇旣賦七言律一首敬生仲  
昭二寅丈贈三絕句因再賦和

八月梅開白一奇黃華金粟恰同時祇因長在春風  
裏閒澹秋光許暫知

又

小葉承花又一奇深紅淺綠共離披獨憐花葉不相  
識多把明珠買侍兒

又

紅梅作實是三奇金彈垂垂綴綠枝乍褪粉香更結  
子不愁零落曉風時

由嘉善赴上海

余宰當湖九月致邑而歸蓋被謗也歸田之日餞  
送滿城直道猶在斯人明年兒善令上海余往視  
之取道嘉善與平湖接壤未免慨然聊成短句  
回頭三宿佳桑陰况奏三時單父琴猶喜分途他邑  
去若經舊治更傷心

別駿公

南風吹浪送輕舟此去燕齊莫滯留七十古稀須一

醉與君潦倒待高秋約余生日至

玉蘭

映水新妝微有影臨風雜珮總無聲冰壺滿插明窗下更憶玉階緩步行

同善兒唐園看牡丹絕句四首

三吳自昔說繁華名卉奇葩不論家暇日與民共欣賞何須自種洛陽花

又

絕世佳人見面難後來環珮自珊珊不知用盡春風力方得花開到牡丹

又

名花初見在唐家木芍藥始見於唐今日芳園爛曉霞喬木

百年同富貴薰風交拂古藤花園有百年古藤

又

太真別殿睡初足西子深宮舞未休倦倚春風渾似醉還來高處拋繡毬牡丹傍白繡毬盛開

改歲詩

祇因歲去難為懷故把別情付酒杯醉臥醒時天已白不知春色入門來

讀樓鑰詩作此解之樓大防宋人

碧梅花發正嚴寒黃菊開時秋色闌但使長存生意  
在一年都作好春看原詩老去光陰似小春如何比  
得少年人君看桃李春風後總  
有花開  
不是真

南遷三國

周自雍祖豫曰東然洛陽  
在河南則亦南遷也

畿內王民往戍申父讐反把作恩人彼都竟無西歸  
意歎息岐豐盡賜秦

晉

牛馬原非父子親渡江倉卒避胡塵始終總不言和  
賊焚幣殿廷亦可人

宋

前有汪黃後有秦可憐奉表反稱臣李綱竄逐岳飛  
死甘作通天負罪人

哭亡女二首

亡時令人勿哭云  
欲往西方莫亂我

衰病龍鐘強自支驚聞消息不堪悲隨舅任  
江右西方只  
是暗龔地哭倒雙親總不知

又

玉雪原非人世姿如何待得老年時適來適去初無  
定愁殺他人奚以為

題重脩唐伯虎墓詩卷

宋中丞倡脩  
沈客子徵詩

昔日風流並宋玉今朝知己屬休文一杯喜近桃花  
塢塢多寒食重登柳七墳

潮音閣聞鐘口號

暮潮歸去早潮來曉鐘敲徹晚鐘催晝夜如斯長不  
舍聞聲深省有誰哉

贈畫師何璉

為余畫小像

何郎筆底有天機幻出老僧及少姬莫笑紅顏傍白  
髮梅花桃李可同時

題兒善小像

列畫琴鶴桃  
李一孫侍側

琴鶴非惟趙閱道桃李不獨狄懷英昔人芳躅至於

汝侍立兒曹共眼明

題詩姪小像

坐桂樹下自執  
書侍兒執鏡

常憐汝父夢春草今日愛爾發秋香金鑑千秋長在  
手知非僅照美人妝

為威寶悼亡絕句

生在綺紈若不知糟糠荆布自安之諸羅浮海能同  
去一往西方獨見遺

又

同夢彩鸞今已非老翁七十欲何依秋蛩嘖嘖夜相  
弔忍看雄雉更朝飛

題顧繡百合萱花蛺蝶圖

百合香濃葳草芳花開引惹蝶飛忙停針遙憶閨中  
秀倦倚東風春晝長

瓶中芍藥花蕊甚大徑似牡丹偶成絕句

祇因弱質不勝春故故後來處下陳麗色濃香盡若  
此何妨寵婢作夫人

雜言

附

梅

一字至  
八字

梅奇哉雪裏開古榦生苔涉園尋幾回一年春色相  
催恰似美人月下來最好是暗香入酒杯

蓮

蓮堪憐葉田田出水嫣然清露濕紅鮮似啼別怨娟  
娟粉香零落曉風前多情處藕斷更絲連

詩餘

秋懷

搗練  
子

楓葉下冷秋江風度寒砧過晚窗雁去不將心緒寸



月明空照淚痕雙

有恨

一絡索

笑啼俱難誰訴相思相誤多情自古易傷心何如昔  
莫相遇 酒醒夢迴何處臨風無語此情竟落路傍  
中路傍裏誰收去

離恨

鵲橋仙

拚死謝君偷生剩妾脉脉關情深切目成笑靨不多  
時都變作袖痕襟血 梅子心酸桃花眼熱幾度暗  
傳心結空畱恨物是人非憔悴向西風離別

過清源書院

續刻

小子談經地興來偶一遊民情亦可見吏術恐難周  
清水曲池入綠陰芳樹稠五峯高處望耕牧接平疇

跋

余以兩言評疊齋詩曰真曰秀且謂真之一字足以盡之夫真詩難得疊齋開口下筆有一不真者乎疊齋之詩直如疊齋之爲人耳笑不期歡啼不期戚善詩者以己之性情入人之性情使讀者悲喜笑啼不能自主乃真之所爲也天下詩人多有疊齋篇章具在必有以信斯言之無假也已茂陵會弟張子瞻識

跋

庖丁解牛批卻導窾無不中節以其有餘地也疊齋先生於詩亦然意之所觸腕卽隨之腕之所到機卽赴之有令人經十日思而不得者有令人卽如其意所欲出者不規規於法而縱橫出入無不合法是殆神於法者之所爲也松廳三載案無留牘移攝州縣不異閒曹是又以作詩之法治民吾願築三尺壇奉疊公以說詩法

東萊後學任虞臣識